



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Septem Illvstrivm Virorum Poemata**

**Cesarini, Virginio**

**Antverpiae, 1662**

Illvstrissimo Domino Natali Rondinino, S.D.N. Alexandro VII. ...

**urn:nbn:de:hbz:466:1-7990**

ILLVSTRISSIMO DOMINO  
NATALI  
RONDININO,  
S. D. N.

ALEXANDRO VII.

PONTIFICI OPT. MAX.  
AB EPISTOLIS AD PRINCIPES,  
HONOR SVPREMVS  
AB IIS HABITVS,  
QVI OB INCOMPARABILES DOTES  
VIVVM SVMME AMABANT,  
ÆQVE LVXERVNT MORTVVM,  
ET HOC ESSE VOLVERVNT  
SIVE AMORIS SVI MONVMENTVM,  
SEV DOLORIS SOLATIVM.

# TACITVS

Lib. XVI. Annal.

*Detur hoc illustrium virorum  
posteritati, ut quomodo exequiis à  
promiscuâ sepulturâ separantur; ita  
in traditione supremorum accipiant,  
habeantq; propriam memoriam.*

# AVSONIVS

Præfat. Parental.

*Nec quidquam sanctius habet  
reuerentia superstitem, quàm ut  
amissos venerabiliter recordetur.*

EMI.

EMINENTISSIMO  
 PRINCIPI  
 PAVLO ÆMILIO  
 S. R. E. CARDINALI  
 RONDININO  
 IACOBVS WALLIVS  
 E SOCIETATE IESV.

**M**ISERVM est, Eminentissime  
 Princeps, amissi boni memo-  
 riam, tantum vt dolor recru-  
 descat, commouere. Quod  
 cum ad res omnes, tum præcipuè ad eas  
 pertinet, quæ nobis vsui, non mancipio  
 dantur. Beneficium enim in contume-  
 liam vertit, qui apud creditorem expo-  
 stulat, suo iure reposcentem ea, quæ gratis  
 & nullo accipientis merito vtenda con-  
 cesserat. Dantis animum interpretari de-  
 cet ex eius beneuolentiâ, rei que commo-  
 datæ pretio & fructu, non metiri solâ  
 temporis diuturnitate. Quò mihi, vt opi-  
 nor,

nor,

nor, minùs verendum est, ne extincti fratris tui Natalis tristissimâ recordatione dolorem tuum exulcerem, & obductam vulneri cicatricem scindam. Si enim à Deo data nobis est vsura vitæ, tamquam pecuniæ, nullâ præstitutâ die, quid habemus argumenti, quamobrem illam ab eo, cùm voluit, repetitam esse conqueramur? At si naturam ipsi nostram animumque consulimus, subest, fateor, eò grauior dolendi causa, quò quis acerbior elatus est funere. Nam in illis qui grandes natu discedunt, magnum est ex ipsâ necessitate solatium; in iis verò quos immatura mors abstulit, ea requirimus, quibus & virtutem ipsi suam extollere altiùs, & prodesse publico diutiùs potuissent. Viuebat in terrarum luce frater tuus, Urbis delicia, nobilitatis decus, literatorum amor, sæculi nostri Phœnix: celebrabatur Alexandri V I I. Pontificis Opt. Max. præclaro iudicio: Principibus atque orbi Christiano suam in Pontificiis literis eloquentiam probauerat splendidam enim, verò, & copiosam, & grauem, & rebus  
maxi-

maximis parem : fecerat sibi exquisitæ  
 doctrinæ atque prudentiæ famam anno  
 ætatis suæ vndetricesimo nondum exple-  
 to: cùm ecce mirificam, quam de se con-  
 citauerat, exspectationem dies vnus inuer-  
 tit. Sed quid agamus, quando eâ lege  
 constant omnia, vt diuturna esse non  
 possint? Iuuat hîc cum Sulpicio Romano  
 Consule, & Iurisconsultorum maximo  
 philosophari paullisper, & eâdem me cogi-  
 tatione confirmare, quâ ipse se & pariter  
 Ciceronem Tulliaæ suæ desiderio confe-  
 ctum sustentabat. Ex Asiâ rediens in Saronico  
 sinu nauigabat: regiones à fronte, à  
 tergo, à latere in prospectu versabantur:  
 earum vrbibus olim amplissimis, iam  
 euersis ne vestigium quidem reliquum vi-  
 debat pristinae celebritatis: Piræus, Co-  
 rinthus nomina erant. Cœpit igitur hac  
 rerum inconstantia mutabilitateque per-  
 cussus secum sic cogitare: *Hem, nos ho-*  
*munculi indignamur, si quis nostrum interijt,*  
*aut occisus est* (& ea vox alterum vulnus  
 refricat, Iosephi fratris tui mortem, quam  
 bello sacro in Cretâ pugnans oppetiit)

quo-

*quorum vita breuior esse debet, cum vno loco  
tot oppidorum cadauera proiecta iaceant?*  
Et ne excidia, quæ ille, persequar, iacet ante  
oculos tuos, Princeps Eminentissime,  
vetus Roma, patria tua, suo oppressa pon-  
dere, diruta, incensa, deleta, sibi ipsa & ci-  
uibus suis sepulcrum, fato, si vt hominum,  
ita & urbium ætates definire volumus,  
præmaturo. Sine lauro & tripode vatici-  
nati sunt, qui æternam illam fore prædi-  
xerunt. Vbi enim nunc vetera illa &  
æquata cælo delubra? disturbata sunt.  
Vbi thermæ in modum prouinciarum  
exstructæ? ne parietinæ quidem super-  
sunt. Vbi amphitheatra? fuisse loquuntur  
historiæ, aut tenues dirutorum reliquiæ.  
Prô fluxam mortalium rerum commuta-  
bilemque rationem! quàm sunt caduca,  
quæ valentissima censebantur! Et mira-  
mur corporum nostrorum massam ex ar-  
tibus & membris fluidis ac mollibus  
compactam aut æuo aut morbo quassari  
& fatiscere? Constantius Imperator Ro-  
mam ingressus, stabat illius magnificen-  
tiâ & splendore perstrictus: mox ad Hor-  
misdam

misdam Persarum Regis fratrem conuer-  
 sus ex eo quæsiuit, quod ipsius esset de Vr-  
 be iudicium. Serio iudicatoque respon-  
 dit sapiens Princeps: *Id tantum sibi pla-*  
*cuisse*, \* *quod didicisset ibi quoque homi-*  
*nes mori.* Xerxis, credo, gentilis Regis  
 recordatus est Persa, quem ferunt, cum im-  
 mensum exercitum oculis obiisset, illacry-  
 masse, quod tot millibus tam breuis im-  
 mineret occasus. Nec potuerunt similiter  
 Urbis opera, quamquam sæculorum om-  
 nium ætatē sua firmitate excedere posse  
 videbantur, magnoperè animum afficere,  
 quando tam angustis terminis ipsa homi-  
 num viuacitas concluderetur. Sint, vt ma-  
 iorem partem sunt, vegeti homines & va-  
 lentes; sint, quales vel pauci, prouidi &  
 actiuosi; sint omnibus naturæ muneribus  
 instructi: nemo tamen, qui vt magna sibi  
 proponat, vt utilitatem publicam pri-  
 mam ducat, vt aggrediendis negotiis par  
 esse videatur: nemo est qui ad ea confi-  
 cienda cauere sibi de vno quasi compe-

A a rendi-

\* Displicuisse in Ammiano legendum censet Regia in  
 Galliâ bibliotheca M S. codex.



rendinatus die possit. Id profectò nos obliuisci vetat plumbeus ille loculus ab Alexandro VII. Pontifice Maximo recens creato in cubiculum inferri iussus, vt cui in Reges ipsos imperium esset, vni se morti obnoxium esse fateretur. Non ille in supremo rerum fastigio constitutus spes longas inchoare, ætatem disponere, lassam & plenam senectutem sibi polliceri: non ab Orientis Imperatoribus sibi exemplum capere, quos accepimus, inter ipsa quibus initiabantur sacra, iussisse varia sibi offerri marmoris frustra, vt, quo ex genere fieri sibi monumentum vellent, eligerent. Dum eligendi fit optio, dum futuri operis designatur forma, dum quadrantur saxa, dum poliuntur, dies abeunt, & quasi medio in spatio frangi non possit vitæ longioris spes, incerto excessui certa mora condicitur. Nihil cunctatus sanctissimus ac sapientissimus Pater primum & triumphalem initi Pontificatus diem non aliter quàm supremum ordinauit: ipsorum quos post se superstites habiturus esset, officium anteuertit: urnæ, quâ funus suum

suum condi vellet, curam ipse suscepit: terminum quem inexorabilis necessitas fixit, cum ignoraret, propè abesse posse existimavit: inter Urbis effusæ gratulationes & plausus, & tubarum e Quirinali arce resonantium festos strepitus credidit fieri posse, quod aliquando fieret. Adeò quilibet dies, hora quælibet, quæ nec opinantes occupare nos potest, quàm nihil firmus, ostendit. Quemadmodum vina per colum perfluunt: ita quod manu complecti putabamus, priùs elapsum esse deprehendimus, quàm elabi aduerteremus. At ille ætate aureâ, quàm orbi dedit, diu fruatur, & quot in extincto fratre tuo desiderabat annos, ipse tecum expleat. Quamquam in hoc explicando voto non sum usus eo verbo, quo decuit. Postea quàm enim hanc sibi delegit tesseram: VIVO EGO, IAM NON EGO: vitam vigoremque ab eo accipit, cuius personam in terris sustinet.

*Ac veluti antiquâ cum ceditur arbore  
ramus,*

*Inseriturque nouæ, matris non ille prioris*

A a 2

Nutri-

*Nutritur succis: aliâ radice tenetur,  
Occultas alio ducit de stipite vires:  
Humorem, quo se foliis & fetibus arbor  
Induat, ipsa suo, cui iuncta est, præstat  
alumno:*

*Haud aliter, qui Romanum nunc temperat  
orbem,*

*Viuit Alexander. Magnum ille capeßere  
iussus*

*Imperium, exactos hinc iam obliuiscitur  
annos,*

*Orditurque nouos. Nec enim quod spirat,  
& aurâ*

*Vescitur, apponit vitæ: diuinior illum  
Spiritus intus alit, magnam qui mentem  
animumque*

*Compleat, & longum extendat virtutibus  
æuum.*

Frater verò tuus, Rondinine Cardinalis, etsi acerbâ morte præreptus, id egit tamen, vt mors quàm paucissima, quæ abolere posset, inuenerit. Non abolebit, vt summatim laudes illius complectar, Pontificis Opt. Max. laudatissimum de illo iudicium, cui nec honorem illum, quem amplif-

amplissimum habuit Hephæstioni sibi  
 carissimo Alexander, comparandum du-  
 xerim. Eius ingenij reliquias, pauca, qui-  
 bus otium oblectabat suum, scripta ab eo  
 poëmata cùm in lucem proferenda amici  
 censerent, eâdem opportunitate sollempnia  
 pietatis vates vati persoluimus, fructum  
 aliquem amicitia non magnum illum  
 quidem, sed causis eò iustioribus à me  
 præsertim debitum, quò maiori honori  
 mihi fuit cum eo amicitiam iunxisse, qui  
 tot abundabat ornamentis & domesticis  
 & propriis. Cornelix genti satis ad lau-  
 dem fuit pro atrio Capitolium habuisse,  
 quòd illic imago Scipionis in cellâ Iouis  
 posita seruaretur, quæ, quoties gentilitium  
 funus efferendum erat, inde petebatur.  
 At fratri tuo non profectò Capitolium  
 tantùm, sed Roma, & eius sanctissima  
 pars Vaticanum, & Mediolanum, & Fa-  
 uentia, & Vectianum, & alia Liguriæ op-  
 pida, quæ maiores vestri ditione tenuerunt,  
 pro atriis sunt, è quibus ad eius fu-  
 nus celebrandum educi potuerunt eo-  
 rum imagines, quos & Pontificia tiara,

374 ALLOCVTIO PARAMYTHICA.  
& purpura, & parta domi militiaeque de-  
cora immortalitati consecrarunt. Sed hanc  
pompam non adornauimus: id tantum  
egimus, vt erepti desiderium solatiis non  
honestis solum, sed etiam iucundis leua-  
remus. Medici, vt est apud Sophoclem,

Πικρὰν χολῆν κλύζοι φαρμάκω πικρῷ.

*Amaro amaram pharmaco bilem eluunt.*

Quantò illi rectius, qui, si id quidem  
ab arte sperari possit, dolori citra dolorem  
medicinam faciunt, aut saltem optimo  
temperamento acerbam dulcibus mitigant.  
Accipe igitur, Princeps Eminentissime,  
dulce hoc leuando luctui repertum à  
poëtis remedium eo vultu, quo & eorum  
pietatem, & fraternarum virtutum com-  
memorationem probes.



E L O.

ELOGIUM  
NATALIS  
RONDININI.

**N**ATALIS RONDININVS ingenij, & morum, & fortune ornamentis, in paucis quos nostra tulit aetas, illustris ac memorabilis fuit. Eo genere Romæ natus, à quo sumere sibi potuit omnia, quibus ipse se, & suos clariores faceret. Nam neque auita illi res & imagines defuerunt, quas ad exemplum intueretur assidue; neque alta accensaq; laudis studio indoles, quæ directis viis euntem impelleret ad fastigia præmiaq; virtutum. Verùm mihi consilium non est funebrem laudationem, quam meretur, instituire. Naturam & artem, magistras optimas, imitabor, quæ res magnas & varias in angusto nonnumquam exhibent. In annulo gemmam gestasse fertur Pyrrhus, in quâ nouem Musæ & Apollo citharam tenens spectarètur, non arte, sed sponte nature ita discurrentibus maculis, ut Musis quoque singulis sua redderentur insignia. Sylla Dictator traditione Iugurthæ semper signauit. Punctis omnia veriùs, quàm lineis designabantur, cùm idoneus situs ac status attribui in tam arcto spatio nulli posset. Referam & ego similiter in has pagellas de Rondini-

*nis contracte aliquid & exiliter, magno inter me & calatores discrimine, quod hi corporum tantum dispendio res suas effingant; ego animorum atque virtutum.*

GENVS suum Rondinini ad Cribellos referunt, nobilissimam apud Mediolanenses familiam. Ut unum pro multis dicam, abhinc annos propè quingentis honoribus, clientelis, opibus abundans Urbanum III. Pontificem Maximum orbi dedit. In gentili parmâ hirundines præferunt, tesseram siue ex cognomento, siue ex euentu natam; cribra præterea, demissa à Cribellis originis, & nobilitatis insigne. Diuersa quidem his & illis appellatio, nec eadem semper habitationis sedes: sed nimirum & fluuij interdum, quasi alij à se sint, non idem seruant nomen, quibus eadem tamen sunt fontium capita, idem aquarum splendor. Neque si surculus in aliud solum depangitur, non ab eodem à quo reuulsus est stipite genus ducit. Mediolano in eam Italia regionem, cui via Flaminia nomē fecit, traductos Fauentia primùm excepit, deinde Roma, ingeniis aliunde aduentantibus apertissima & perhospitalis. Et habet hoc illa princeps urbium & terrarum, ut communis omnium patria dici & esse velit, non ignara, ut constituta olim sit, ut aucta, ut coalita ex varijs quasi elementis in unum corpus, aduenis fortuito coeuntibus in ciuitatem acceptis. Extulere Rondininos duo, pacis & belli artes: quarum utra plus illis ad gloriam valuerit, nihil attinet definire. Satis constat neque sapientia fortitudinem, neque fortitudini sapientiam dignitate

te cedere. Patrem habuit Natalis Alexandrum, virum eximiâ in agendis rebus prudentiâ, & præter generis splendorem omnibus elegantiorum literarum disciplinis excultû. A Natale auo suo nomen accepit. Is primus è suis sedem rerum & fortunarum ex illâ, quam dixi, Italiae Cispadanae parte Romam trãstulit in comitium ac forum orbis terrarum. Ad tractandas res natus videbatur, naturâ æquè ac disciplinâ consultus. Quæ optauit, videri potuit affecutus omnia, non quod possideret, sed quod eâ esset moderatione animi, vt nihil appeteret, suus semper, nulli obnoxius, ab honorum studio alienus, virtute quàm eiusdem præmijs ornatior. Cuius rei fama, cum grauissimorum munerum administrationem plurimi peterent, Summos Pontifices in illum primò non petentem, deinde vt inclinata ad quietem studia viderunt, etiam recusantem conuertit. Clementis VIII. iussu Romani fori disciplinam suo splendori nitenti restituit: recidit corrupta, integra roborauit, stabiliiuit antiquos & conuenientes tribunaliû maiestati mores. Ad annum vsque centesimum, grande mortalis æui spatium, vitam protulit, summâ semper dignitate, nullâ auctoritatis imminutione. Neque enim omne vinum, neque ætas omnis vetustate vigorem exspirat. Viguit animo & corpore vir moderatissimus vsque eo quoad opus ipsa suum eadem, quæ coagmentauerat, natura dissolueret. Legationes, alterum togatae sapientiæ munus, & nobilitatis ornamentum, famam quoque Rondinini confecerunt. Nicolaus, multiplici rerum cognitione, & usu, & singulari



eloquentiâ præditus, apud Venetos Legati munere  
 perfunctus ampla negotia tractavit, summoq; in ho-  
 nore habitus est. Eo maiori illud ponendû in laude,  
 quòd non alibi diligentius Legatorum dicta factaq;  
 observari dicant, ac propterea Venetiæ optima habeantur  
 palæstra, è quâ prodire Legati quàm instructis-  
 simi possint. Laudat Nicolaum Marcus Guazzus in  
 Commentarijs suis vernaculâ Italarum linguâ con-  
 scriptis, qui è privatis eruditorum scrinijs & bi-  
 bliothecis nondum exierunt. Bartholomæi Rondini-  
 ni prudentiæ & fidei oblata est tempestas difficillimi  
 temporis, quo Cardinales aliquot coitione temerè  
 Pisis factâ Iulij II. Pontificis Maximi auctori-  
 tatem labefactatum ibant. Erat is è S. Dominici  
 familiâ, Theologia & Iuris Pontificij, scientissimus:  
 præerat summâ cum potestate Congregationi Tu-  
 scia à S. Marco nominatæ, atque unâ cum viris ali-  
 quot doctrinâ consilioq; pollentibus per idem tempus  
 Pisas se receperat. Stabant pro Cardinalibus Reges  
 quidam: spargebant in Pontificem criminose multa:  
 ruebant contra in illos Pontificia fulmina, tamquam  
 facti à Romanâ Sede diuortij reos. Magnæ erant in  
 illis fluctibus iactationes animorum, offensiones in  
 vulgus magnæ, in tantâ præsertim partium conten-  
 tione atque dignitate: Pisis in primis, ubi res gere-  
 batur, & in partes vocabantur Clericorum & Reli-  
 giosorum hominum ordines. Sub initium, quid seque-  
 rentur, constituere satis Pisani non poterant. Ad  
 Bartholomæum ( tanta erat viri apud omnes au-  
 thoritas ) causam detulere, in sententiam, quam-  
 cumque

cumque is ingrederetur, concessuri. Hæc dum gere-  
 bantur, potentes intereà ac factiosi sollicitare opti-  
 mum Patrem, primò molliùs, gratia & honorum  
 certâ spe; deinde acerbè, multa ac metuenda mini-  
 tando, ut irritati solent animi stomachum post  
 perditas blanditias effundere vehementiùs. Sed ad  
 labefactandam fidem spes & metus excellenti animo  
 iuxtâ valent. Nihil igitur ille obnoxie dicere, pro-  
 palàm obuiam ire obstinatis consilijs, aduersarios vi-  
 argumentorum verecundiâq; percellere: nutantes  
 erigere, stantes confirmare: Pontificem eorum, quæ  
 gerebantur, certum facere. Quod ipsi totiùs Cænobio  
 inuidiæ & obtreçtationi fuit, ac propè capitale.  
 Nam etsi occultis vijs literæ mittebantur, fieri ta-  
 men non potuit, quin earum aliqua, tamquam hosti-  
 les manubiæ, ab Urbis Præfectis interciperentur. Ab-  
 stersit periculi metum, quicumque is fuit, Cardina-  
 lium repentina discessio, Mediolanum conciliabuli  
 sui sedem deligentium, siue quòd causæ suæ admo-  
 dum inuisos haberent Pisanos, siue quòd hæc vrbs  
 aduersus Pontificia arma minus tuta videretur, fessa  
 quatuordecim annorum recenti bello, & iam Gallicus  
 equitatus in urbem intromissus hostilia fecisset. Ma-  
 gnâ peperere Bartholomæo laudem Pisanæ res, qui  
 cum deinde vitâ concessit, non sui tantum reliquit  
 apud omnes desiderium, sed, quod potius est, præcla-  
 ram sanctimonie famam. Bellicus quoque labor  
 Rondininos illustravit. Materiam dedit conuersio  
 rerum ac perturbatio, cum Romani Pontifices in  
 Galliâ se haberent. Quæ inter potentiores certamina  
 tum

tum exarserint, quæ visa fuerint celo terraq; prodigia, dici vix potest. Concussa est intestino bello Italia: belli non alia causa, quàm lubido dominandi: florentissimæ urbes, tamquam vacuæ possessiones, armis occupatæ: Carrarij Pataviû, Mantuam Passerini, Canes Scaligeri Veronam, alij alia sibi asseruerunt. Nicolaus Laurentij, scriba populi Romani, incertum stolidior an ambitiosior, in Tribuniciam potestatem ac ius Imperatorium inuasit, in eamq; spem venit homo vanissimus, posse se multitudinem eludere in illis suis cogitatis furoribus inani iactatione libertatis. Ludovicus Bauarus iniussu Romani Pontificis Ioannis XXII. pro Imperatore se gerens Romam adiit: aduersus illum nefario consilio alium Pontificem legit, ab eoq; Imperij sumisit insignia. Deflagrauit in monte Celio Laterana Basilica: cometa, solis defectioes, pestes, annonæ penuria terrori & exitio fuerunt. Tanto stetit Pontificem alibi quàm Romæ degere. In hac atrocitate temporum, armorumq; licentiâ, consilium, bellicamq; virtutem, & in Romanos Pontifices fidem probauere Rondinini. Replicare memoriam annalium Latinè atq; Italicè scriptorum, è quibus res eorum peti possunt, magni est operis, certè non huius instituti aut loci. Nec posteaquàm Pontifices Romam remigrarunt, cum Italis debellatum fuit. Eugenius I V. Pontifex Maximus bellis undique premebatur, ut vix ei respirandi facultas esset. Piccininus copiarum Dux, Pontifici infestus, ingenio & armis ferox, populabundus vexabat Italiam: quidquid Mincio, Athesi, Benaco & Sebino lacubus allui-

*tur, magnâ ex parte subegerat. Per Aemiliam deinde  
 Flaminiamq; belli fragor intonuit. Bononia, Forum  
 Cornelij & Liuij, Rauenna, aliaq; Pontificia ditio-  
 nis oppida, ipsum etiam Picenum armis eius inſeſſa.  
 Victoriarum curſum cohibuit Boldrinus Rondini-  
 nus, pugnandi æſtu cum ſuis mediam perſtringens  
 hoſtium aciem, vitæq; periculum poſt virtutem ha-  
 bens. Nec defuit fortuna virtuti. Piccininum cepit,  
 & Manfredo Fauentino Regulo captiuum duxit ſiue  
 belli ludibrium, ſiue victoriæ pompam. Vetera illa:  
 hæc recentia. Iosephus Rondininus Natalis noſtri  
 germanus frater, belli ſacri incenſus cupidine, hono-  
 rariæ militiæ rudimenta apud Venetos poſuit. Sicum  
 Turcico ſeruitio preſſum obſidebant, oppidum apud  
 Illyricos in ſinu Scardonico, in conſpectu irrumpen-  
 tis freti ad montis radicem poſitum, atque arce fir-  
 matum. Primus huc illum impetus rapuit, laboris  
 æquè ac periculorum auidum. Inde ad Cliffam admo-  
 tus exercitus, quæ creditur Diocletiani fuiſſe patria,  
 ab eo Diocletia dicta, & adhuc priſcæ appellationis  
 extremum neſcio quid viſa retinere. Neque enim  
 commentitium videtur, ſi Cletiam in Cliffam dege-  
 neraſſe quis dixerit poſt frequentes incuſſiones bar-  
 barorum, urbibus æquè ac rerum nominibus multam  
 labem inferentium. Quæ lacinia videri poſſit huic  
 narrationi inconcinniter attexta, niſi forte, quando  
 in huius urbis mentionem incidimus, meminiffe et-  
 iam iuuet, vnde homo immaniſſimus obſcuriq; gene-  
 ris ad Imperium emerſerit, qui Chriſtianam fortitu-  
 dinem eò illuſtrauit magis, quò acrius ad illam oppri-  
 mendam*

*mendam*

*mendam incubuit. Vrbs in rupe naturali situ munita, capta sæpius amissaq̄, cùm denuò ex Turcis recepta est, bellicis Rondininum præclarè exercuit. Mox enim Venetorum Senatus honoris causâ eum in Cretam ampliorem Martis campum euocauit, externaq̄ Candie vrbs munimēta eius fidei virtutiq̄ commisit. Exacuit generosi iuuenis animos data prouincia, vt fermè prima militiæ præmia. Quam dum strenuè sustinet, Turcæ per obscurum noctis, magno, vt solent, numero, pari ferociâ illum adorti sunt: tantoq̄ ardore pugnatum fuit, vt valla saucijs dilapsisq̄ propugnatoribus pænè nudata occupataq̄ sint. At ea res malè mox Turcis vertit haud sanè inultis. Voce namq̄, & manu Rondininus terrorem in hostem reuocans, audaciam in suos, magnâ strage barbaros propulit: dumq̄ acrius, ultraq̄ quàm tutum erat, cedentes insequitur, muralis tormēti glande prostratus, ruinarum more, quæ super id quod oppressere franguntur, victor occubuit ingenti luctu suorum, anno M. DC. XLIX. VII. Idus Septembris, non illâ utique ætate tollendus, quippe qui annum secundum & vicesimum vixdum excederet, & admiratione militaris indolis in se veteres quoque milites conuerteret. Hæc aliq̄, habuit Natalis in paternâ domo bellicæ togatq̄ virtutis decora, quibus ad laudem accenderetur. Nec minorem in pectore aluit flammam memoria rerum maternas. Felix Sachia eius mater, perquàm illustri loco nata, maiores habuit Vectiani in Liguriâ aliorumq̄, quæ circa sunt oppidorum dominos, armis ac literis inclytos.*  
*Vtrisque*

NATALIS RONDININI. 383

Vtrisque clarus fuit Laudiuius Sachias, miles Hierosolymitanus, & ut ingenij cultum in militari viro agnoscas, Nicolao V. Pontifici, bonarumq; artium fautori optimo maximo apprimè carus; electus quem cubiculo ac familiaritate æstimaret. Alter Laudiuius (sunt quippe nominum æquè ac decorum retinentes familia) Felicis Sachia pater fuit. Coniuge è viuis ereptâ, primùm in Consilij Pontificij consessu aduocationis ius adeptus est, deinde quatuor Pontificum præclaris iudicijs commendatissimus vixit. Sub Clemente VIII. Curia Apostolica ærario pro Tribuno; sub Paulo V. Pontificio Patrimonio pro Legato fuit: ab hoc etiam Episcopus Montis Falisci creatus: à Gregorio XV. missus ad Venetorum Rempubl. Nuntius: ab Urbano VIII. admotus iterùm ærario, dein Pontificij Palatij Præfectus, postremò in amplissimum Cardinalium Collegium secundâ eorum nominatione cooptatus. Paulum Aemilium, Laudiuij huius fratrem, per varios quoque honorum gradus ad purpuram ac propè altius euexit parta prudentia usu rerum maximarum. Cùm adhuc adolescens in literis emereret, ac deinde iuris cognitione primus inter æquales esset, & apertiore in dies famâ nosceretur, venit in sermonem gratiamq; Clementis VIII. Is in Cubicularios intimos eum retulit, quæ fuit ad res grauiores quædam quasi prolusio: post signandis gratiæ causis cognitorem adhibuit: in Apostolicâ Curia delegatæ à se iurisdictionis iudicem esse iussit: inter Pontificij Consilij Notarios, Participantes appellant, gratis allegit:

legit:

legit: Nuntium ad Catholicum Hispaniarum Regem extra ordinem misit: tandem Cardinalem creavit, suo iudicio dignè, ac merebatur, magnificeq; laudatum. Cùm enim eius merita breuiter carptimq; repperet, Iurisperitum sanctissimo Purpuratorum Patrum Senatui à se adiungi dixit nulli secundum. Ergò illi iam purpurâ donato Pontifex summa quæque & arcana committere: conquiescere in illius prudentiâ & fide: illum æstimare ac diligere impensè. Amorem existimationemq; augebant quotidiana negotia prosperè expediteq; confecta. Inter hac animus illi erat multâ humanitate temperatus, & quo nihil est ad conciliandos homines accommodatius, beneficus ac liberalis. Faliscorum Ecclesiam cùm regendam suscepisset, inaugurationis sollemnia Pontifex ipse pro suo erga illum studio in Lateranensi Basilicâ peregit: mox Episcopi munus Congregationis Concilij Tridentini Præfecturâ cumulauit. Tantâ sapientiæ & integritatis famâ cùm floreret, & in Clementis VIII. locum successor esset subrogandus, dignus habitus fuit, qui in Comitijis Vaticanis suffragia omnium mereri & ferre posset. Ita sensit ac scripsit Cardinalis Peronius literis ad Henricum IV. Gallia Regem à se datis. At, quæ est rerum humanarum inconstantia & breuitas, non multò utique longiùs in Pontificatu victurus fuisset, quàm qui illum adeptus est Leo XI. siquidem hic v. Kalend. Maij, septimo & vicesimo ab electione die; ille prid. Kal. Iunij, eodem vterque anno, quatuor tantum & triginta dierum intervallo (iuuat enim, ut

NATALIS RONDININI. 385

ut pauperes tenuis summa, ita per angustis temporis  
 rationem exactius inire) vitam unquam honores ter-  
 minarunt. Videri posset alter Paulus Aemilius, Ale-  
 xandri Rondinini & Felicis Sachia filius, hereditate  
 adisse aui & auunculi sui purpuram, si ut fortuna,  
 sic animi bona ad alios peruenirent. Sed & illum sua  
 virtus, sua in Remp. Christianam merita in Cardi-  
 naliū Collegium aggregarunt. Adeo perennis ac  
 propria est huic familiae claritas & amplitudo, rara  
 prorsus felicitate. Vna Pherenice, ut memorat  
 Plinius, quæ filia, soror, mater Olympionica-  
 rum: opprimit mentionem memoriamque laudis hu-  
 ius Felix Sachia, filia, mater, cognata Cardinalium.  
 Vna familia Curionum, in qua tres continuâ  
 serie Oratores exstiterunt: plus est, unam esse,  
 quæ totidem habeat consiliarios & iudices orbis ter-  
 rarum. Vna Fabiorum, in qua tres continui  
 Principes Senatus: maius, tres ex unâ in eum  
 Senatū adscitos esse, qui non modo Regum, quod  
 aiebat Cyneas, verum etiam Dei Diuorumque confes-  
 sum referat. Sed me rerum maximarum inter se com-  
 paratio longius ferat: nunc ad narrationis ordi-  
 nem venio. Felix Sachia Alexandrum Rondini-  
 num coniugem suum anno ætatis eius primo &  
 quinquagesimo adhuc æui immaturum amiserat li-  
 beris nouem relictis, cum tota domus onus eius esse  
 cœpit. Quamquam hi orbi putandi non fuerunt ma-  
 tre incolumi, non spectata tantum probitatis, sed  
 etiam doctrine feminâ. Quod Sempronio Graccho  
 Cornelia, Martia Hortensio, id Alexandro fuit



Sachia. Nullo præceptore, ut docilitatis atque ingenij magnitudinem videas, ad discendas Latinas literas usa est, sibi dux & magistra, & antiquitatis tam profana quàm sacra diligens indagatrix. Curam igitur in liberorum institutione eò maiorem posuit, quò & ipsa accuratius honestarum artium studiis pueritiam, adolescentiamq; excoluerat. Paulus Aemilius, & Iosephus, alter in purpurâ, alter in sago, ut iam dixi, ostenderunt quid benè provideq; nutrita indoles posset. Laura non tam in matris gremio, quàm sermone educata, politiores etiam literas animo complexa est, & ipsa inter Lelias, & Licinias, & Mutias, & siquæ præterea parentibus suis doctrinâ & eloquentiâ responderunt, nominanda. Præceptoribus usa est Tarquinio Gallutio, & Alexandro Donato, viris è Societate IESU, eruditione & editorum Operum famâ notis. Sollicitam institutionum diligentiam merebatur prouocabatq; emittens illius ingenium. Quod ipsa deinde ita exercuit & expoliuit, ut post illos, quorum præceptis informata est, fortasse etiam cum illis legi & placere posset. Certè Cardinalis Bentiuolus cum suam de Bello Belgico historiam Latinè ac perpolitissimè verti cuperet, eamdem illi commendauit, ac tradidit. Sed defugit hanc operam virgo, non tam declinatione laboris ac studij, quàm modestiæ curâ. Sermo ac stilus illi cultus ac nitidus, in quo nullus ambitiosè putideq; quæstus color. Neque enim ignorare poterat deformari orationem plus æquo affectatam, perinde ac corpora, siquis vulsa atque fucata mulie-

NATALIS RONDININI. 387

muliebriter comat, fœdiora fiunt ipso formæ labore. Super sunt adhuc nonnulla eiusdem tam soluta quàm numeris ligatæ orationis præclara monumenta, ex quibus facile apparet, compluribus eam viris dubiam eruditionis palmam fuisse facturam, si literis, quàm religioni vacare maluisset. Humanis quippe rebus valere iussis, institutum S. Teresie secuta, in cœnobium sese abdidit, ubi sanctæ religioseq, in quo sunt omnia, vitam etiamnum, quod & diu faciat, exigit rerum diuinarum contemplatione dulcem atque tranquillam. Atque hætenus pauca è multis, velut faces in funere, præire iussimus: nunc sequatur ipse, cui funus ducitur. Quæ ad eius genus pertinent, ad eum quoque pertinere existimauimus. Nam etsi ea quæ ipsi non fecimus, nostra non sunt; nostra tamen, si in magnâ generis claritate splendorem habent, hoc ipso maiora esse necesse est. Ita Luciferum ceteris stellis clariorem esse nouimus, quòd hæ in tenebris tantum, ille oriente etiam sole stationem teneat, luceatq;. Annum ætatis nonum attigerat Natalis Rondininus, cum Alexandrum parentem suum luxit. Dabat iam tum ingenij iucundi & elegantis specimen ijs in literis, quibus ætas puerilis ad humanitatem informari solet. Ex ephebis egressus, Bononiam sedem ac magistræ Philosophiæ habuit, longè ijs dissimilis, qui ex Academico tantum otio licentiam vsurpant. Ipse toto animo ac studio ad laudem incumbere: audire magistros, ab ijs audiri: intelligere, se in vestibulo scientiarum omnium stare; in earum deinde adyta penetrandi spem nullam fore, nisi

ingenium hinc prius diligenter exercuisset. Nec Mathematicas disciplinas negligendas putauit, ut scilicet ad rem militarem, si ad hanc forte animum adiunxisset, paratior instructiorque esse posset. Et quamuis alio consilia verterit, totumque se Deo dederit, incundos tamen & utiles de rebus bellicis miscebat sermones in loco, non quales eorum sunt, qui debellaturi videntur super mensam Alexandrum, imperiti rerum. Hauserat partim ex praeceptionibus aliorum, partim ex historiis, quae ad ordinem legesque militiae pertinent: quis castrorum locandorum situs: quae instruenda aciei formae, ac varietates: quae cingendarum urbium descriptiones: quando cum hoste conferenda manus: quando quiescendum. Aliquot post annis Bononiâ in Urbem reuersus Theologiae & Iurisprudentiae operam dedit, hanc etiam publicè interpretandi donatus facultate. Exin sollemne illud suum semper tenuit, ut lectissimis quibusque auctoribus volutandis tempus daret. Atque ut se oblectant qui ad celebrium fluuiorum capita consistunt, eorum praesertim qui auriferas arenas secum vehunt; ita iucundissimum illi erat ad sanctorum Patrum lectionem accedere, ex quibus videret aurea illa promanare sapientiae flumina, unde & sitim posset explere, & riuos deducere. Otij quoque sui partem ad sacram & profanam historiam contulit. Hanc ille oblectationem honestissimam utilissimamque ducere: hinc petere dicta, facta, consilia publicè priuatimque, salubria: quam alij prudentiam agendo experiendoque, ille sedendo legendoque comparare: ipsam in aduersis aliorum

rum casibus misericordiam iucundam putare. Huic studio finitimum fuit sacra, ritus, leges, instituta gentium obseruare, etiam barbararum. Erat igitur illi memoria velut ararium opulentissimum, e quo eruditionis suae diuitias opportunè depromeret. Accedebat his Latinarum literarum amor & cultus, & sine quâ nullus est ad vitam communem studiorum fructus, eximia in scribendo dicendoq; venustas & copia. Interdum poëtico incalescens afflatu carmen scribebat veterum genio, puris verbis lectisq; sententijs. Vel eâ causâ secessus in Umbriâ apud Eminentissimum Principem fratrem suum Paulum Aemilium Rondininum Cardinalem, Assisij Episcopum, gratissimus illi accidit. Parentauit hîc Sidronio Hofschio è Societate IESV Poëta cultissimo, dulcibus & expolitis elegis receptus sui amœnitatem allato de eius morte nuntio corrumpi questus. Paucula quidem eius poëmata, quæ velut naufragij reliquiae ad nos peruenerunt, publici iuris fecimus: sed lectorem si non lassabunt, explebunt tamen, & plura fient sæpè relegendo. Literariam supellectilem ut augetet, in Graciam quoque nauigauit, hoc est, ad scriptores Græcos animum appulit: Neminem, dictitans, sine hoc præsidio absolutum aliquid in ijs artibus, quæ ad humanitatem pertinent, consequi posse: Veteres Romanos eloquentiæ suæ opes omnes è Graciâ in Italiam conuexisse: illius linguæ opulentiam & suauitatem nullius interpretis oratione representari: illam Byzantio in Italiam, unde totos septingentos annos exulauerat, ab hominibus nobilissimis olim

*reductam fuisse; mox à doctissimis quibusque arre-*  
*ptam generoso contentoq; studio: turpe nunc Romana*  
*iuuentuti fore Musas Atticas in bibliothecis iacere*  
*neglectas & situ obsoletas. Tot tamq; valentibus in-*  
*ductus causis inuigilabat in his studijs, veneratq; illi*  
*in morem non solum lectitare libros Græcos, verum*  
*etiam Græco sermone cum Deo loqui. Excultum lite-*  
*ris animum ornabant castissimi mores. Crederes Pu-*  
*dicitiam ipsam ab eius latere numquam discedere, &*  
*animi corporisq; velut templi Deo dicati ædituam*  
*esse, quæ profanum aliquid aut immundum eò infer-*  
*ri non sineret. Mira illi erga amicos fides, & in obse-*  
*quio comitas: sermo ingenuus, & ab omni fūco alie-*  
*nus: plus in animo benevolentia & officij, quàm in*  
*verbis, thesaurorum more, quibus plus est opum in*  
*recessu, quàm in superficie ostentationis. Sacerdos, &*  
*in Vaticano templo Canonicus sacris operabatur fer-*  
*mè quotidie, ad eumq; Numinis cultum dignam affe-*  
*rebat templis & aræ cōtactu probitatem. Tantâ vir-*  
*tute sapientiaq; instructum asciiuit Alexander VII.*  
*Pontifex Maximus in aulam suam, in quâ velut in*  
*regno suo virtus est, eumq; sibi ab Epistolis ad Prin-*  
*cipes scribendis esse voluit publicâ Urbis gratulatio-*  
*ne. Quâ integritatis, & prudentia, eloquentiaq;*  
*laude munus suum administrauerit, superuacaneum*  
*sit dicere. Non deerunt decora ingenia, quæ cum ad*  
*tempora Alexandri VII. dicenda venerint, historia*  
*sua inserent quas illius ingenio elucubratas literas*  
*de rebus grauissimis ad Principes dedit. Sed ecce dum*  
*tanto Pontifici se quotidie probat magis, & in Ro-*  
*manâ.*

NATALIS RONDININI. 391

manâ luce non amorem sui tantum, sed etiam admirationem mouet, supremus illum dies occupat, maiorumq; rerum spem, quæ in cursu erat, intercipit. Labet hîc coronidis loco apponere, quæ de præmaturâ eius morte ad Iacobum Vallium scripsit Illustrissimus Ferdinandus Furstenbergius: non quod me deficiant verba (quamquam & illa in tam acerbo casu deficiunt) sed quod hæ literæ exstare laudariq; mereantur professione pietatis. Sic igitur habent:

**N**Oli, mi Walli, plures à Natali Rondinino nostro epistolas exspectare. (& dederat cum sæpè aliàs, tum septē antè diebus, quàm fatalis eum morbus corripere, ita elegantem, & uberem, & officij plenam, ut eam dictasse ipsa videri posset Humanitas.) IV. Non. Septemb. quindecim dierum febrî, heu dolor! consumptus est, tantâ nobilitate, virtute, eloquentiâ, ac doctrinâ iuuenis, ut meritò sæculi nostri Phœnicem quis appellet. Nondum tricesimum ætatis annum attingerat, & iam tum omnes antiquos quâ profanos, quâ sacros scriptores legendo peruaserat. Dicit non potest, quantum ex eius morte dolorem S. D. N. ceperit. Amici omnes mœrore contabescunt: ego tam molestè eius desiderium fero, ut ne in parentum quidem morte plus hauserim acerbitalis. Omnia amicitiaë officia ægroto præstiti, semper affui, animam agenti astiti, & benè precatus sum, oculos defuncto clausi, & acerbissimis adhuc lacrymis

392 ELOGIVM NAT. RONDININI.  
creptum prosequor. Vbi dolor parùm remise-  
rit, forsan Musis me meis solabor: tu quoque  
molestiæ mihi partem tuis absterge.

*Multis ille quidem flebilis occidit:*

*Nulli flebilior, quàm mihi.*

Mecum illi tam arcta consuetudo ex simili-  
tudine animorum ac studiorum coorta inter-  
cedebat, vt Castorem & Pollucem diceret, vti-  
nam alternâ morte redimendos. Sed quid ego  
longiùs dolori meo ac lacrymis indulgeo?

*Durum, sed leuius fit patientiâ*

*Quidquid corrigere est nefas.*

His epistolam, non lacrymas meas finio. Ro-  
mæ VI. Id. Sept. M. DC. LVII.

*Natus est Natalis Rondininus anno M. DC. XXVIII.  
XIII. Iulij: excessit M. DC. LVII. II. Sept.*



APOL-

APOLLONII FLORENTIS  
 AD  
 FELICEM ZACHIAM,  
 NATALIS RONDININI  
 DEFUNCTI MATREM.



*Idit ut ereptum properato funere natum,  
 Flentibus immoto pectore mater ait:  
 Mortalis genui mortalem; animoq; supre-  
 mum,*

*Cum peperit, occurrit tempus & atra dies.  
 Vana tamen ratio, & rerum te fallit imago,  
 Pace tuâ liceat dicere, docta parens.  
 Perlege NATALEM celebrantium carmina, in cuius  
 Carmina diuinis edita ab ingenijs:  
 Teq; immortalē nati de nomine, & illum  
 Laudibus eternum viuere nosce suis.*



HONOR SUPREMVVS  
AVGVSTINI FAVORITI  
A D  
FELICEM ZACHIAM

In funere Natalis Rondinini filij.

Ex Albano secessu.

*S*ecretæ nemorum valles, mutiq; recessus,  
Et deserta loca, & taciturna querentibus antra,  
Quæ priscos habitasse ferunt (& credere dignū est)  
Mortales, sine lege pios, sine messe beatos,  
Accipite hos agro proruptos pectore questus,  
Quos pietas, quos ager amor, luctusq; requirunt.  
Et vos frondoso surgentes vertice fagi  
Me finite, erepti lugentem funus amici,  
Illius æternum vestris incidere nomen  
Corticibus: meus hîc saltem, dum stabitis, unâ  
Viuet amor, luctusq; mei monumenta manebunt.  
Me finite hîc viridi carmen, lacrymabile carmen,  
Tristibus ad citharam numeris disperdere in umbrâ,  
Quod recinant, qui se querulis solantur auenis.  
Dulce queri miseris: dedit hoc natura leuamen.  
Hoc animi, quæ vix umquam coitura putares,  
Vulnera dictamno curat, mulcetq; dolorem.

Floraæ

NATALIS RONDININI. 395

Plorat Ityn Progne; consortem turtur ademtum;

Cæcyca Alcyone; casum Phaëthontis olores.

Scilicet & mæstis implet nemus omne querelis

Flebiliter quærens absentem bucula matrem:

Et nunc hæret inops animi, nunc arrigit aures,

Si quæ fortè procùl crebris mugitibus instet,

Errantem admonitura sui: nunc acta furore

Dat gemitus incompositos, & in auiâ fertur,

Terror Hamadryadum, stragesq; miserrima silvæ.

Illa peregrinum, natorum oblita, iuuentum

Per saltus sequitur, vel fæsta altaria circum

Flore reuincta caput magnis cadit hostia Diuis.

Iusta quidem caræ iam pridem soluimus umbra:

Nec cineri amplexus, largus nec defuit imber

Funeri, ubi casu perculsi, ac vulnere primo.

Sed præstans animi Natalis, & indole pulcrâ,

Constantiq; fide primis mihi iunctus ab annis

Triste sui desiderium luctumq; reliquit,

Vt me nulla dies solari, nulla queat res,

Cogar & in longos absumere lumina fletus.

Ergò siue aperit rebus lux alma colorem,

Siue aufert umbrâ inuoluens nox humida terras;

Dilecti manes, dilecta occurrit imago,

Pallida, languenti viola, vel grandine tacto

Narcisso

Plorat

*Narcisso similis, frigentiq; ore videtur  
 Oscula ferre genis, & brachia tendere colla  
 Cara meo, qualem supremo in funere vidi,  
 Cùm iam frigida mors oculis induceret umbras,  
 Me quærentem oculis, & pectore singultantem:  
 Cùm Fernandus, amicitia pars tertia nostra,  
 Astaret lacrymans; sancto mox cedere iussis  
 Officio lacrymis, Superos in vota vocaret,  
 Difficilesq; obitus, animamq; exire parantem  
 Celesti firmaret ope, ac prece feruidus omni.  
 Hæc rerum species animum noctesq; diesq;  
 Infelix subit; hæc sensus mi surripit omnes,  
 Nec sinit à tristi curâ requiescere mentem.  
 Nam neque Castalides, mihi dulcia nomina quondam,  
 Quæ me illi ad laudẽ comitẽ, quamquã impare gressu,  
 Addiderant, & amore pio, paribusq; ligarant  
 Auspicijs, possunt miserum lenire: nec ipse,  
 Quæ releuent agrum, Phæbus pater inuenit herbas.  
 Cetera, quæ pariter quondam oblectare solebant,  
 Omnia sunt ingrata: nihil iuuat. Hæc loca certè,  
 Ipse hic formosi nemoris gratissimus horror,  
 Et fortunati gelidus fons graminis altor;  
 Ipse lacus ridens, auium securã voluptas,  
 Sylvarum decus, & Latia telluris ocellus,*

NATALIS RONDININI. 397

In lacrymas questumq; trahunt. Hæc ille solebat  
 Mecum animis, studioq; pari loca adire quotannis;  
 Hic pariter mecum fugientes condere soles  
 Alloquio dulci, curarum oblitus, & Urbis.  
 Hæc illi regio dilecta: hinc sæpius illum  
 Naiades pulcræ, pulcræ stupuere Napeæ  
 Casta Philetæis sociantem carmina chordis.  
 Non tamen æstorum cursus, non abdita terris  
 Prodigia, aut ortus ventorum, vel maris æstus,  
 Omnia adhuc hominum studijs ignota, canebat:  
 Sed Christi Heroas, immoto barbara vultu  
 Supplicia expertos, ignominiasq; Tyranni;  
 Sed laudes Superùm, & diæ virtutis honores,  
 Quæq; docet verax, & fallere nescius Auctor,  
 Humanâ maiora fide penetralia rerum.  
 Inde ad ALEXANDRI deflectens inclyta facta,  
 Commemorabat, uti Saturnia sæcla redirent,  
 Et probitas, & sancta fides, iam Præside terris,  
 Qui sciret regni hanc molem non ære, nec auro  
 Stare, nec arte hominum, sed religionis amore,  
 Sed virtute animi, & veterum pietate parentum.  
 Illius auspicio Latijs è finibus actam  
 Esuriemq;, grauemq; luem; decora addita templis;  
 Reddita virtuti sua premia; reddita Musis

Otia,

Oia, & erectas artes: illoq; sequestro  
 Venturam populis post tristia bella quietem.  
 Omnia, quæ summi quondam præfaga Dei mens  
 Cùm fore prospiceret, nostræ miserata labores  
 Gentis, ALEXANDRO mandasset fulmina, & orbis  
 Imperium, quamquam magnis virtutibus impar.  
 Talia non ficto referebat carmine vates,  
 Si quando à grauibus curis, studiisq; seueræ  
 Palladis, & doctis animum reuocaret Athenis.  
 Rudera vel Latij, & prisca monumenta Senatus  
 Lustrabat, veterum gaudens incisa metallis  
 Ora virum, & sculptas à tergo noscere pugnas,  
 Gnarus & armorum. Nemo nam certius illo  
 Norat, quæ belli ratio circumdaret vrbi  
 Mœnia, quæ victrix aperiret machina muros.  
 Illum ego sæpè equitum stantes peditumq; maniplos  
 Et pugna instructas acies, & Martia castra,  
 Præliaq; in docto scribentem puluere vidi.  
 Tunc igitur dulces auras, & dulcia nostræ  
 Pignora amicitia, tantarum in limine rerum,  
 Deferis, inq; tuo surgentes nomine cunctas  
 Spes Latij perdis? nihil ergò ars docta medentum,  
 Nil herba valere? nihil flos viuividus æui?  
 Nec fratrum te cura vigil, nec sedula mater,

Nec

*Nec dilecta Deo soror eripere periclo?*

*Vtq; tuas parco delibem carmine laudes,*

*Non tua te pietas, non culta altaria, non te*

*Candida mens animi, aut docta facundia lingua,*

*Non vis ingenij præstans, & ducta per omnes*

*Ingenuas artes, leto subduxit acerbo;*

*Cùm gentem innumeram, telluris inutile pondus,*

*Non nisi post seram mactet Libitina senectam?*

*O semper damnata pati fata aspera virtus!*

*Vidi ego periuras, prædæq; nocentis onustas,*

*Post longos pelagi errores, casusq; per omnes,*

*Incolumes tamen ad patriam remeasse carinas:*

*Naufraga cùm gemeret puppis, quæ litore ab Indo*

*Tunc primùm niueis pacata per æquora velis*

*Ibat ouans, Diuùmq; aris pia thura ferebat.*

*Interea casum ingemuit Romana iuuentus,*

*Fissa suum decus extinctum: ingemuere relicta,*

*Et tibi ferali crinem cinxere cupressu*

*Pierides, fluuiog; dolens Tiberinus ab alto*

*In mare visus aquis Tuscum dilabier atris.*

*Ipsam etiam dolor inuictum tot casibus, ipsum*

*Flexit ALEXANDRVM, lacrymisq; in funere crudo*

*Penè profanari cælestia vidimus ora.*

*Quippe acre ingenium Pater æquus norat, & alta*

*Semina*

*Nec*

*Semina virtutis, patrioq; fouebat amore.  
Nimirum ille, sacro solium stipante Senatu,  
Principibus, te vate, dabat responsa benignus,  
Voce tuâ solitus populos armare fideles,  
Sive laboraret Venetus, seu tristis Enyo  
Verteret Heluetiam, seu bello assueta nefando  
Suecia Sarmaticos vastaret milite campos.*

*Sed iam cesset inops dolor infelicia verba  
Fundere. Tu felix, Diuorumq; vnus, Olympi  
Securâ de parte, nigris Aquilonibus aetam  
Serpere sacrilegam, populosq; exurere flammam,  
Perq; omnes volitare vides bella impia terras,  
Pauperiem circum, miserâq; ferentia clades.  
Inde hominum genus, & casuras despicias vrbes  
Altior inuidiâ, & Regum capita ardua calcas.  
Quod tibi si celsam mortalis gloria mentem  
Tangit adhuc, non tu tabulis, nec marmore Luna,  
Aereve, quod Siculis miscent Cyclopes in antris;  
Sed merito ipse tuo, & vatum sacrabere chartis.  
Illa ruunt euo tandem consumpta, vel igni:  
His Lachesis, rerumq; vices, & fulmina parent.  
Nempe tuum posthac nulli violabile fato  
Illorum fidibus viuet decus: hi tibi famam  
Longius extendent vitali carmine, quàm si*

NATALIS RONDININI. 401

Marmore de Libyco, aut Ephyreio duceret arcu  
 Graia tuam manus effigiem, vel barbara moles  
 Ægypti ad calum saxis audacibus iret,  
 Insanus labor, & solamen inane sepulcri.

Quin etiam (qui rarus honos) tibi Belgica plorans  
 Sollemnes struit exequias, & funera Clio:

Carminibusq; sacris inscriptas litore in illo  
 Pyramidas statuit, laudum monumenta tuarum,

Æternùm mansura; licet sæpè illius oram  
 Litoris implacidum latè voret æquor & vrbes.

Sed neque me immemoris, si vera recepit Apollo,

Arguerint animi venientia secula: nomen

Quippe tuum, nosterq; dolor, lacrymaq; manebunt.

Nec tibi quæ mæsta inferias, ac debita mittit

Munera, ALEXANDRI multum sublata fauore,

Iuerit ad seros ingloria musa nepotes.

Tu verò Latias inter clarissima matres,

Atque olim numero doctarum addenda sororum,

Vrbis honos, Felix, lacrymis absiste profanis:

Neu nati turbare velis ingrata quietem.

Cùm Vaticanam facerem pullatus ad aram,

Seruari quæ certa fides ossa inclyta Petri,

Et requiem dulci, veniamq; precarer amico,

Reddita, vel mihi visa sacro vox reddier antro:

Cc

Dic

Mar-



*Dic bona verba: procùl feralia vota, sacerdos.*

*Iam pridem cœtu Superùm, solioq̄, receptus*

*Egregius iuuenis: scelerum vix flamma piatrix*

*Distulit æterna pereunti gaudia vite.*

*Nunc ille ætherio graditur spectandus in ostro,*

*Effigiemq̄, Dei, cuius fulgore beantur*

*Celestes animæ, multùm sub imagine pulcri*

*Quæsitam in terris, manifestâ in luce tuetur.*

*Iam calo apparet medio, sidusq̄, benignum*

*Collibus affulget Latijs, & lumine certo*

*Signat iter, quo nisa polum subit ignea virtus.*



DANIELIS PAPEBROCHII  
E SOCIETATE IESV

A D

FELICEM SACHIAM,  
post cæsum in propugnatione Candixæ filium  
IOSEPHVM RONDININVM,  
ALTERO IAM FILIO  
NATALI RONDININO  
ORBATAM.

Non posse eam vitam breuem dici, quam  
numeris omnibus virtus & doctri-  
na absoluerint.

**C** *Vr ego felicem verear te dicere, Mater,  
Sis quamuis iterum pignoris orba tui?  
Odrysiis alter cecidit tibi filius armis,  
Alterius cineres Romula texit humus.  
Flendus uterque tibi: sed, si locus æqua monenti est,  
In gemino luctu quo releueris habes.  
An, quia supremos nondum compleuerat annos,  
Creditur ante suum raptus uterque diem?  
Demens, qui vitam spatio metitur & annis:  
Quantula sit, longam gloria magna facit.*

Cc 2

Nesto-

*Nestorea equauit Pelides secula, quique  
Edomito Magni nomen ab orbe tulit.*

*Antè senescenti fluerent quàm vertice cani,  
Implerant meritis tempora longa suis.*

*Sic tuus Euganeis felix Iosephus in armis*

*Non multos multo clausit honore dies.*

*Sic tuus infertur tumulo Natalis auito,*

*Augustæ nuper Sedis & Urbis amor.*

*Victorem toties terra illum Gnosia vidit,*

*Vt nequeas vitæ de breuitate queri:*

*Hunc virtus matura polo transcripsit & astris,*

*Longæuos posset quanta decere senes.*

*FELIX ergò mihi scribèris SACHIA semper,*

*Nec tibi ius dubium nominis huius erit.*

*Quis tamen orbatam lacrymis prohibere parentem,*

*Tristia quis gemitu fata carere velit?*

*Non ego durus in hoc: potiùs solantia mittam*

*Carmina: soluendis luctibus illa valent.*

*Et decora & laudes dicam Natalis adempti:*

*Gnosiacas lauros qui canat, alter erit.*

*Qui genus, unde domo, quæ prisca gloria gentis,*

*Ducta per antiquos cæra loquetur auos.*

*Vos mihi Pierides (vestras nam fertur in vlnas*

*Matris ab amplexu sepiùs isse puer)*

Vos

NATALIS RONDININI. 405

Vos mihi, quæ vita series, quas acta per artes,  
 Pandite, cur dici se vetet illa breuem.  
 Quattuor ad quinos nondum sociauerat annos,  
 (Prima bonis etas artibus ista patet)  
 Iam Graia tentare puer primordia linguae,  
 Iam Latio cœpit cultiùs ore loqui.  
 Pierias illum Phœbus deduxit ad undas,  
 Doctaq; Castalijs ora rigauit aquis.  
 Seu caneret syluas, syluas cantare decebat,  
 Materiae versu conueniente suæ:  
 Sive per heroum laudes foret impetus ire,  
 Par erat herois impetus ille modis.  
 Sæpè etiam, dum rostra quatit puerilia, magnis  
 Prælusit causis: & satis oris erat.  
 Scilicet has artes ipso cum lacte tenellus  
 Hauserat, inq; sinu, Sachia docta, tuo:  
 Illo nempe sinu, quo Paulus, & æmula Paulo,  
 Ceu Sophia in gremio, lusserat antè soror;  
 Laura Soror, quâ non veteres Heroïdas inter  
 Altera Romano cultior eloquio:  
 Cuius & ingenio conferri Tullia sese  
 Gaudeat, & Gracchos quæ tulit vna duos.  
 Perge Puer, nec tu Fratri, nec cede Sorori:  
 Se quoque vincendum sperat vterque Parens.

Vos

Cc 3

Dum

*Dum loquor, ipse rotas Academi in puluere versas,*

*Quò vocat admissos area maior equos.*

*Hic quoque victorem cerno; robustior etas*

*Vix illi stadio sit licet apta satis.*

*Neuerat hæc, vitæ dum florida curreret etas,*

*Stamina festino pollice Parca tibi.*

*At ubi prima togæ cessit prætexta virili,*

*Ingenio nulla est meta statuta tuo.*

*Quid fora, quid leges, quæ iuris forma tuendi,*

*Qui posses trepidis utilis esse reis,*

*Exigui docuit mora temporis, inq̄, capaci*

*Visa resedisse est pectore tota Themis.*

*Hinc etiam annorum seriem nouisse priorum,*

*Et veteres Fastos discere cura fuit.*

*Alterâ cura, Dei Fideiq̄, arcana notare,*

*Quâ licet, & nostris mentibus illa patent.*

*Voluebas Graios, Latiosq̄, ex ordine Patres,*

*Quosq̄, sequuta pares sæcla tulere viros.*

*Nec tamen armatæ spernebas Pallados artes,*

*Doctus ab hac quo sint bella gerenda modo;*

*Quæ melior vallo, quæ fossis forma profundis;*

*Quis bellatoris certior usus equi;*

*Quis locus insidijs, Marti quis factus aperto;*

*Exiguus quantas subruat ignis opes.*

NATALIS RONDININI. 407

*Et poteras tinctas hostili sanguine lauros  
 Ad patrios victor sepè referre lares:  
 Et poteras seris celebrandum etatibus olim  
 Romanos inter nomen habere duces:  
 Ni pia præ diris placuissent otia bellis,  
 Teq; sibi Diuus conciliasset Amor.  
 Sensit Alexander (quid enim non sentiat ille,  
 Creditus à magno maximus esse Deo?)  
 Sensit, & : O iuuenum, dixit, cultissime, nost.  
 (Sic quoniam virtus rara meretur) eris.  
 Otia siue Deo, seu Musis sacra placebunt,  
 Tota domus Musis, tota dicata Deo est.  
 Hic poteris rerum strepitus contemnere mecum,  
 Pectoraq; æthereis pascere delicijs.  
 Hic poteris cultas animum versare per artes:  
 Amplius his tribuit, quàm mea, nulla domu  
 Venerit à magnâ quoties mihi litera dextrâ,  
 Reddetur digitis charta notata tuis.  
 Non ego præcipuas metuam tibi credere curas,  
 Quæq; petunt certam multa tacenda fidem.  
 Non metuam per te geminos in fœdera Reges  
 Poscere, & heu! longas improperare moras.  
 Dixit, & augusto tectoque animoque receptum  
 Sollicitâ iuuenem fouit & auxit ope.*

*Sachia felices inter numeranda parentes*

*Quid tibi tunc animi, quid tibi mentis erat?*

*Cùm Vaticano natorum maior in ostro*

*Germanum sacros susteret ante pedes:*

*Cùm tibi septeni submisso vertice colles*

*Plausum, & lætitiæ publica signa darent;*

*Natalisq; tui cupiens contingere dextram,*

*Tota tuam visa est Roma subire domum.*

*Hei mihi! quã nulla est umquam diuturna voluptas!*

*Gaudia quàm dubio stant peritura loco!*

*Qui modo Romanã fuerat celeberrimus aulã,*

*Non leuis egregiæ spesq; decusq; domus;*

*Concidit in medio titulis crescentibus æuo,*

*Ceu rosa quam subitã grandine læsit hiems.*

*Stans tamen & lacrymis genitrix animosa repressis,*

*Quã sinit ingenti mistus amore dolor:*

*Non mihi Dictæas, inquit, qui cæsus ad arces*

*Gnosiacam fuso sanguine sparsit humum,*

*Creditur ante diem fati cessisse; nec iste*

*Ante suum raptus creditur esse diem.*

*Illum Threicijs obstantem fortiter armis,*

*Per quæ multa tulit vulnera, plura dedit,*

*Pro patrijsq; sacris, pro relligione cadentem*

*Annis constat aui nil eguisse sui.*

S  
S  
S erat?  
ent ;  
n,  
m.  
a voluptas!  
o!  
ulâ,  
s ;  
iemis.  
sa repressis,  
arces  
um,  
dit,  
m  
iste

NATALIS RONDININI. 409

*Iste quid innumeris maius retulisset ab annis,*

*Moribus & studijs quàm placuisse Deo?*

*Quàm placuisse viro, Christi quo sacra regente*

*Nil maius, nil par maximus orbis habet?*

*Maëte animis generosa Parens: sic viuere pergas,*

*Sic minuant reliquam funera nulla domum.*

*Hunc etiam, quem terra tegit, morsq; inuida nostris*

*Sustulit ex oculis, ne perÿsse puta.*

*Viuit, & Ausoniâ memorabile nomen in aulâ*

*Supremos illi contigit ante rogos.*

*Hoc quoque nequa dies, venturaq; nesciat atas,*

*Sat nutus summi Principis vnus erit.*

*Annuerit Belgis, ibunt in carmina Belgæ,*

*Quotquot Apollineâ nomen in arte tenent:*

*Annuerit Latijs, Latij præconia vates*

*Digna viri meritis ingenioq; canent.*

*Nec nihil huc nostræ credent se posse Camæna,*

*Paruaq; erunt turbæ pars celebrantis idem.*



FERDINANDI FÜRSTENBERGII  
 A D  
 A V G V S T I N V M  
 F A V O R I T V M.

De morte Natalis Rondinini S. D. N.  
 ALEXANDRO VII. Pont. Opt. Max.  
 ab Epistolis ad Principes.

**N**on ita Lampetie casu Phæthontis acerbo  
 Fleuit, & ambusto Cygnus in amne Padi;  
 Non ita Pelides, mediâ cum vidit arenâ  
 Actoriden sparsis cade iacere comis;  
 Tros Anchisiades non sic Pallante peremto,  
 Nec Theseus cari funere Pirithoi,  
 Ut mihi mæsta pio tabescunt lumina fletu,  
 Imag, perpetuos pectora dant gemitus,  
 Dum desiderio mentem perfixus inani,  
 NATALIS mutos conqueror ad cineres.  
 Crudeles Diuos, crudeliaq, astra vocanti.  
 Nulla venit misero nocte diève quies.  
 Nec magis, heu, lacrymis saturatur luctus amaris,  
 Quàm matutino rore perustus ager.  
 Si fugit interdum, vagus ut Meander, in orbem  
 Mox redit, & sese decipit ipse dolor:

Notaq,

HONOR SUPREM. NAT. ROND. 411

*Notaq̄ dilecti passim NATALIS imago*  
*Occurrit madidis obuia luminibus,*  
*Dulcè loqui fido, velut antè solebat, amico,*  
*Brachiaq̄ & caras tendere visa manus.*  
*Siue etenim ripam Tiberini propter amœnam*  
*Cernere veliuolas, quas vehit unda, rates,*  
*Et septem geminis latè spectare iacentes*  
*Collibus antiquæ me iuuat Urbis opes,*  
*Pyramidasq̄ nouo ductas ad sidera sumtu,*  
*Et Vaticano templa superba tholo:*  
*Siue suburbanas Latij peragrarè ruinas*  
*Mite iubet sancti Principis imperium,*  
*Albanumq̄ lacum, dilectaq̄ rura Mineruæ*  
*Posthabitis Romæ visere delicijs,*  
*Montis ubi quondam per viscera ductus aperti*  
*Fatalis Veijs irrigat arua liquor:*  
*Semper amarities, semper dolor heret eunti,*  
*Et cruciat miris anxia corda modis.*  
*Nec vetus Alba grauem potis est mihi demere curam,*  
*Vmbra nec æstiuis Tuscula frigoribus;*  
*Nec nemus Egeriæ, Scythicæ nec regna Diana,*  
*Nec lacus occulti conscius Hippolyti.*  
*Téne malâ, iuuenum castissime, fraude nouercæ*  
*Distractum rapidis membra cruenta rotis,*

Téne

Notaq̄

*Téne Coronides medijs è faucibus Orci*  
*Ereptum Triuia restituisse Dea,*  
*Et letos oculos, roseumq; potentibus herbis*  
*Os valuit, nitidas & reparare comas?*  
*At miserum, vt primæ NATALIS flore iuuentæ*  
*Occidit indigno flebilis interitu,*  
*Non pietas, non sancta fides, non Pallas, & omnis*  
*Aonidum tanto cultus amore chorus,*  
*Ipsè nec ætherias reuocare ad luminis auras*  
*Sustinuit medicæ Cynthius auctor opis?*  
*I nunc, & demens animos attolle superbos,*  
*Et Zephyro plenos finge tumere sinus.*  
*Finge miser titulos, & grandia munera rerum,*  
*Et spera Pylj tempora longa senis.*  
*En iacet exigua iuuenis compositus in urna,*  
*Promeritus cæptis omnia fausta suis.*  
*Nam quid ALEXANDRI meritis fauor, aut quid*  
*honorum*  
*Spes, & fraternâ fœdera iuncta fide?*  
*Quid præclara domus, genitrix aut profuit illi*  
*Optima, Castalias inter habenda Deas?*  
*Læta quid aspirans rebus fortuna secundis,*  
*Et plausus totâ maximus Ausoniâ?*  
*Scilicet exorare nefas est fata, nec vlli*  
*Parcarum licuit frangere duritiem.*

Non

NATALIS RONDININI. 413

*Non tamen Heroum manes inferna coërcent  
 Flumina, nec Stygij pallida regna Iouis.  
 Aetherias illos virtus sublimis ad arces  
 Euehit, & campis consecrat Elysiis.  
 Hic, hic NATALI domus est: hinc arduus imas  
 Sub pedibus terras despicit & maria;  
 Miraturq; novos orbes, conuexaq; mundi  
 Mœnia, & innumeras, splendida signa, faces.  
 At licet huic longos Libitina inuiderit annos,  
 Dum meritis implet Solis utramque domum;  
 Ne tamen vlla queat nomen delere vetustas,  
 Prouisum Clario gratulor esse Deo.  
 Dum terras atque omne sibi denunciet æuum,  
 Curaq; ALEXANDER posteritatis erit;  
 Dum pius in Venetos animus studiumq; canetur,  
 Classis & Aegeo Thracia victa mari;  
 Dum referetur amor, quo tristia bella Tyranni  
 Ardet in excidium vertere Bistonij,  
 Quo res Sarmatiae, viduataq; Cesare regna  
 Curat, & impositos Alpibus Heluetios,  
 NATALI constabit honos, vniusaq; manebit  
 Doctrina, & Suada nomen, & ingenij.  
 Semper ALEXANDRI, sacra per vestigia, laudes  
 Ponè sequens, ibit clara per ora virum.*

Tu

Non

Tu quoque Pieridum decus, AVGVSTINE, sororum,  
 Quo Latium, & timidis Macra superbit aquis,  
 Ingenuos mores, & vitam puriter actam,  
 Cordaq; non ullis tacta cupidinibus,  
 Virtutesq; alias cari memorabis amici  
 Carmine, quod possit nulla abolere dies.  
 Nam neque signa tuæ spirantia marmore Luna,  
 Nec Polycletæâ nobilis arte labor,  
 Longiùs extendant famam NATALIS in ævum,  
 Quàm tua Meonia proxima Musa tubæ.  
 At mihi, cui tantum non concessere Camœnæ,  
 Vt canerem paribus grandia facta modis,  
 Sat fuerit gelidis extrema dedisse labellis  
 Oscula, & exangues imbre rigasse genas.  
 Sat fugientem animam fato legisse supremo,  
 Et clausisse piâ lumina cara manu.  
 Sat tumulum lauri folijs ornare quotannis,  
 Et cineri multâ soluere iusta prece.

ROND.

415

G V I L I E L M I B E C A N I  
E S O C I E T A T E I E S V

N A T A L I S , I D Y L L I V M  
I N O B I T V M

N A T A L I S R O N D I N I N I

S. D. N.

A B E P I S T O L I S A D P R I N C I P E S ,  
A D E M I N E N T I S S . C A R D I N A L E M  
P A V L V M R O N D I N I N V M  
F R A T R E M .

**D** *Esine fraternum lacrymis urgere sepulcrum,  
Paule, supervacuos effundere desine questus.*

*Frater adhuc superest, & post sua funera vivit.*

*Quos coluit, vitam nomenq, dedere poeta.*

*Aequora dum Tiberis, Tiberim vicina subibunt*

*Flumina, quas raptò laudes scripsere, legentur.*

*Hæc vatùm pietas: nec adhuc Natalis amati,*

*Quo se cumque ferunt, \* occurrere cessat imago,*

*Visa loqui fidis, velut antè solebat, amicis,*

*Et dare complexus, & tendere brachia frustra.*

\* Vide Elegiam Ferdinandi Furstenbergij pag. 411.

Nos

GVI-

Nos etiam (& nobis sunt carmina, nos quoque vatum  
Dicimur è numero, timidè sed credimus, esse)

Nos etiam procùl à Latio, procùl Alpibus illi,  
Quà licet, extremos mæsti curamus honores.

Exequias facimus, tumulumq; sacramus inanem,  
Et sua dilectos manes ad sacra vocamus.

Huc Natalis ades: sollemnia soluimus umbris  
Belgæ iusta tuis. Belgas Natalis amauit.

Clitumni ripæ, Romaniq; Umbria testis

Patria Callimachi, fatis ut nuper ademptum

Fleuerit Hosschiaden: (Romano proximus ille

Callimacho fuerat) simul indè à finibus illis

Inferias caræ pia carmina miserit umbræ.

Nil homini certum est. Egon' hæc, Natalis, amico

Cùm faceres, eadem tibi mox præstanda putauit?

O exspectatum frustra tibi longius æuam!

Vixisses saltem, dum, quæ gens omnis & ætas

Noscet, Alexandri licuisset dicere facta!

Non alijs plus se iactassent secula fastis.

Raptus es ante diem, nec adhuc sat cognitus orbi:

Raptus es, & tecum solatia rapta tuorum.

Ipsi etiam montes, ipsæ tua tristia fata

Fleuerunt rupes: sed mors est durior illis,

Et tantum precibus, cùm summa vocauerit hora,

Tantum

*Tantum lamentis hominum mitescere nouit,  
 Balatu teneri quantum lupus efferus agni.  
 Quid clarus sanguis, quid sit domus inclyta, nescit.  
 Stirps tibi contigerat titulis insignis auitis,  
 Ingenium stirpi, virtus equalis utrique.  
 Ut decori vites ulmis, ut vitibus ulmi,  
 Te genus ornabat, generi famamq; decusq;  
 Tu laturus eras. Iam rebus leta futuris,  
 Aggredere ô magnos, dicebat mater, honores.  
 Strata via est: patuit summi tibi principis aula  
 Virtutum sedes. iter hac tibi gloria pandit.  
 Signauit frater quo tendere tramite possis.  
 Euge meus sanguis, tu fors eris alter ab illo:  
 Purpura quem deceat, te dicar habere secundum.  
 Infelix mater, perijt tua messis in herbâ.  
 Natalis cinis est. Quos nec fuit utile nasci  
 Intereâ viuunt, & terra probra supersunt.  
 Parcite Pierides. Deus omnia respicit equus.  
 Non toti morimur: pars effugit optima letum.  
 Hac adiit Superos, & iam labentia sub se  
 Sidera Natalis, vastos miratur & orbes.  
 Iam libat vitæ fontem, sitiensq; saturq;  
 Ambrosiæ ducit succum, & se nectare pascit.*

D d

Hic

Tantum



Hic pater, hinc illi tulit obuius oscula \* frater,  
 Sanguine frater adhuc stillans, plagisq; decorus,  
 Valla quibus seruata sibi sua Candia debet.  
 Inter & amplexus: Viridi, pater inquit, in æuo  
 Te quoque, Natalis, rapuit mors: tu quoque nobis  
 Accedis iuuenis: sed qui maturus Olympo est,  
 Non cadit ante diem. Tuus hic neque longius annos  
 Produxisse velit frater. Quæ vulnera seruet  
 Aspicias? his Diuum vitam sedesq; beatas  
 Possidet: his illi, quam cernis, gloria parta est.  
 Tum procerum turbam magnam, magnoq; coruscantem  
 Lumine designans: Maiorum, nate, tuorum  
 Hic, ait, agmen habes: sunt hi, quos maxima virtus  
 Eripuit terris, atque istâ sede locauit,  
 Sanguinis auctores, & nostræ stirpis origo.  
 Deducensq; manu Natalem miscuit illis.  
 Stellantis mundi ciuis, decus addite Diuis,  
 Natalis salue. Tua iam tibi premia constant.  
 Aspice nos. Quæ sit votorum summa, requiris?  
 Quæ tibi nuper erat. Petimus quod sæpè petisti.  
 Vuat ALEXANDER: nos sospite viuimus illo.  
 Vuat, & hic populos celi fauor ibit in omnes.

Non

\* Iosephus Rondininus, de quo in Natalis elogio.

*Non radios Titan, quàm curas ille paternas  
 Latiùs extendit : quidquid vastissimus ather  
 Orbibus immensis, animo complectitur ille,  
 Communisq; pater toti se diuidit orbi.  
 Relligio, cultusq; Dei super omnia curæ.  
 Hostis Alexandri est, quem non habet illa fauentem.  
 Si premitur, fulcit ; si quà labat, ipse ruinam  
 Sustinet, & quidquid non est reparabile, deflet.  
 Quales esse suos, queis viuere moribus optet,  
 Exprimit ipse suis, & vix imitabilis ulli  
 Quemque suæ vitam cuperet componere vitæ.  
 Premia digna quidem meritis oramus vt illis  
 Sera tamen veniant. Subeat, fac, sidera tardè,  
 Deq; tibi demtis illi Deus augeat annos.  
 Illi Roma diu regimen quo gaudeat, illi  
 Debeat æternam mundi pars cetera pacem.  
 Pannonia fines, habitataq; Thracibus arua  
 Mars petat: in diros vertantur prælia Turcas:  
 Auctor Alexander belli noua fœdera iungat:  
 Euocet Europæ populos, atque agmina magno  
 Auctorata Deo trans Hæmum mittat & Hebrum.  
 Nomen Alexandri Byzanti terreat arces,  
 Concutiat Rhodopen, Hypanim cum Strymone turbet,  
 Bistonibus fatale, feris fatale Gelonis.*

D d 2

Illius

420 HONOR SVPREM. NAT. ROND.

*Illius auspicijs Aquilas, & Lilia, & auro  
Vellera fulua, Crucis fulgens super omnia signum  
Bosporus euersis videat succedere Lunis.*

*Quò ferimur Musæ? reuocant Natalis ad urnam  
Nos cari cineres, & dona nouissima poscunt.*

*Sparge puer flores, & vatum insignia lauros,  
Et dic: Ista tuo, Natalis, spargo sepulcro:  
Vt viuet aternùm laurus, tua viuuda semper  
Gloria, Alexandri fama comes, ibit in euum.*



GVI.

G V I L I E L M I H E S I  
 E S O C I E T A T E I E S V  
 E L E G E I A I N O B I T V M  
 I L L V S T R I S S I M I D O M I N I  
 N A T A L I S R O N D I N I N I,  
 S. D. N.  
 A L E X A N D R O V I I.  
 A B E P I S T O L I S  
 A D P R I N C I P E S, E T C.

Quem ex benè instituto virtutis & honorum  
 cursu primo viuentibus eripuit præmatura  
 mors anno Christiano M. DC. LVII. ætatis  
 eius XXX. nondum impleto.

**M**agna, sed exiguo te, RONDININE, sepulcro  
 Sub modico terra cespite Roma tegit.

Te cohibet brevis urna, sinuq; amplectitur arcto.

Ah! brevis est, totum quem brevis urna capit.

Æst ego credideram, quod credere nempe iuebant

Ingenij vigor & spiritus ille tui,

Parq; animo genus, & docta facundia lingua,

Te septem Romæ collibus esse parem.

Credideram, nec vana fides. Nunc omnia tecum

Abstulit extremi temporis vna dies.

*Exiguum, quodcumque fuit mortale, putandum est:*

*Quod cadit, & casu frangitur, heu! nihil est.*

*Ipse sacra secreta manus tibi credidit ille*

*Numinis interpres, proximus ille Deo,*

*Magnus ALEXANDER: morituro nil tamen illud*

*Profuit: è tanto es parua quod urna tegit.*

*Fatorum immortale odium non gratia tanti*

*Principis, aut fame lenijt aura tua.*

*Cribellos Rondininis Insubria iunxit:*

*In titulos venit sanguis vterque tuos.*

*Sed neque te nomen, quamuis tibi, Roma, colendum,*

*Nec sanguis, quamquam nobilis ille fuit,*

*Nec casta texere Deæ, quas carmine sacro*

*Ille tuus toties sollicitavit amor.*

*Audijt orantes pro te Libitina sorores;*

*Non exorato sed stetit illa pede.*

*Terq; solum pulsans: Finis sit denique vitæ,*

*Dixit; & heu! summum concidis ante diem.*

*In fletus abiere nouem, pia Numina, Musæ,*

*Quas tuus in lacrymas ire coëgit amor.*

*Parcite, dicebant, morituro fata clienti:*

*Fata aliquod Musas numen habere putant.*

*Et fuit ex illis quæ vos quoque flectere posset:*

*Et noster quos non flectere possit amor?*

NATALIS RONDININI. 423

*Parcite : noster hic est. Singultus cetera preßit.*

*Et carmen lacrymis inuolüere suis.*

*Flete pia Musæ; nec sit pudor ora rigare*

*Fletibus : & lacrymas vidimus ire Deo.*

*Ille etiam fleuit, qui maior Apolline vestro,*

*Septenis Romæ collibus imperitat,*

*Et ius præscribens toti venerabile mundo,*

*Proxima, nec vano sub Ioue, regna tenet.*

*Quò tamen hæ lacrymæ? properât data stamina Parcæ*

*Et, mora ceu nimium lenta sit, una secat.*

*Occidis. Incubuit flens Fürstenbergius ori,*

*Et fugientem animam ponè sequente animâ*

*Cum gemitu & lacrymis ter & ampliùs exclamauit:*

*Sed iam per lactis fugerat illa viam,*

*Quæ castis celi medium splendore ambit,*

*Heroësq; super sidera fixa locat.*

*At, quamquam celo iam, RONDININE, receptum*

*An quisquam est qui te nos quoque flere vetet?*

*Flebimus : extremo fletus medicina dolori est.*

*Est aliquid mæsto carmine posse queri,*

*Immites, genus indomitum, fera numina, Parcas*

*In magnos nimium iuris habere viros.*

*Quò tamen hæc? lacrymis potius laudabere nostris:*

*Non vana, lacrymæ, pondera laudis habent.*

*Flebimus, heu! nostros, tua nuper gesta, dolores:*  
*Materiam pleni carminis illa dabunt.*  
*Vita dabit numeros; numeros quia continet omnes,*  
*Totaq̄, adhuc cineri spirat iniusta tuo.*  
*Ah! quàm vana mei quero solatia luctus!*  
*Amissus cruciat, cùm memoratur, amor.*  
*Pœna queri est, & amare dolor: cedamus utrique:*  
*Et leue fit, subeas quod patienter, onus.*  
*Scilicet immites alijs quoque stamina Parcæ*  
*Non exoratâ dissecuere manu.*  
*Occidit Hesperij proles augusta Philippi:*  
*Totus in hac tantùm prole Philippus erat.*  
*Vnica in hac erat occidui spesq̄, ultima regni;*  
*Illa tamen Patris fletibus immoritur,*  
*Et votis calum frustrâ ferientibus ipsum,*  
*Nuda quater-magni nominis umbra iacet.*  
*Nec minùs ille tuâ vincētus Romane coronâ,*  
*Hungare & ille tuâ, atque ille Boème tuâ,*  
*Successor datus Imperio Reçtorq̄, paterno,*  
*Ceu rosa quam veris prima pruina necat,*  
*Ostensus tantùm terris cadit. Austria casum*  
*Pænè oppressa grauem sensit; & in lacrymas*  
*Et gemitus effusa, suoq̄, infracta dolore,*  
*Fernandus, tantùm hoc flebile dixit, Obit!*

NATALIS RONDININI. 425

*Ab genus immansuetum & inexorabile, Parca!*

*Funeris exuuias qualibet una tulit:*

*Tresq; simul ternas capiti rapuere coronas.*

*I nunc, & capiti disce timere tuo.*

*Illi magna licet sit gloria, gratia maior,*

*Perdere utramque dies una, vel hora potest.*

*Maxima saepe leui franguntur & optima casu.*

*Respicit occasum grandior umbra suum.*

*Quem citò maturum celi indulgentia fecit,*

*Ante suum fructus carpitur ille diem.*

*Plena operum magnorum, aurisq; inuecta secundis*

*Frangitur in caeco pressa carina vado.*

*Parua subit seros post lenta pericula portus,*

*Nec cadit irato victima cymba mari.*

*In vulnus mortemq; patet pinguisima ceruix:*

*In montes celi fulmina prima cadunt.*

*Magnarum hic rerum cursus fuit. Optima metam*

*Prima tenent: lentè currere laus minima est.*

*Acta brevis vita, seros non computat annos*

*Posteritas. Res est magna fuisse parum,*

*Et multum vixisse. Inter lamenta virorum,*

*Et lacrymas vitam claudere, magnificum est.*

*Qui rectè vixit, vixit satis: ampliat annos*

*Vir bonus, & summam temporis omnis habet.*

Ab

D d 5

Sic



*Sic RONDINIVS vixit, sic viuere terris  
 Desiit. Aetati bis tria lustra dedit ;  
 Saecula virtuti. Flentes discedite Musa :  
 Haec pretium vitæ mors melioris habet.  
 Funus honoratum est. Nullus lugubria sumat :  
 Ambiat illustrem candida turba rogam.  
 Vita peracta benè est. Defuncto plaudite ciues  
 Romulei : lacrymas non petit urna leues.  
 Urna triumphali Musarum ornanda coronâ,  
 Quam circum pennâ remige Fama volet,  
 Et celebret fausto victurum carmine nomen ;  
 Quam facilis morum gratia, nobilitas,  
 Ingenij decus, & casta facundia lingua,  
 Turbaq; virtutum cingere semper amet.  
 Urna etiam in celsas Romæ extollenda columnas,  
 Seu Traiane tuas, Ælie siue tuas ;  
 Quam non ullus edat liuor ; quam è monte Quirini  
 Magnus Alexander sæpè videre velit ;  
 Cui dicat, quoties virtus sublata recurret,  
 Atque eadem sensus causa recentis erit :  
 Iam RONDINIVS dolor est meus : at meus ille,  
 Si modò fuissent fata, fuisset amor.  
 Et dolor est & amor. Virtutû, hic sensus vterque  
 Quem fateor, cælo iudice, testis erit.*

ELO-

ELogiVM SEPVLcRALE  
 ILLVSTRISSIMI DOMINI  
 NATALIS RONDININI  
 QVATVOR PYRAMIDIBVS  
 INSCRIPTVM.

*Pyramis prima.*

Quod semper discimus,  
 & numquam satis scimus,  
 illud nunc denuo,  
 sed experimento luctuoso,  
 plusquam satis docti sumus;  
 inter homines  
 etiam NATALEM esse MORTALEM.  
 Hoc cum dico,  
 non de die tecum loquor,  
 cuius vel vnus incerta possessio est,  
 qui cum sole præcipiti fugit & perit;  
 sed de illo,  
 qui extra vim & impetum solis positus,  
 tenore constantis vitæ censeretur æternus.  
 RONDININVS ille,  
 non tantum ex Christiano nomine,  
 sed etiam ex spe  
 quam promittebat vitæ magnæ atque magnificæ,  
 ex summâ expectatione naturæ atque fortunæ,  
 ex vsurâ breui Pontificiæ serenitatis,  
 ex vero NATALIS,  
 à morte, si non factus, ostensus certè  
 MORTALIS est.  
 Quem non iam diem  
 sibi feralem esse credant homines,  
 quando  
 NATALIS ipse MORTALIS est?

*Pyra-*

ELO-

*Pyramis secunda.*

Annos nondum xxx.

impleuit ætatis;

sed famæ & virtutis

compleuit immensos.

His auctum titulis

Aula sancta coluit, & Roma suspexit;

quodque his maius est,

ALEXANDER VII. PONT. MAX.

secretorum apud Principes

testem habuit,

& suâ,

( quantum infra se submitti Pontificia Maiestas potuit )  
amicitiâ dignum fecit.

Ille

eductum ab auro stemmate altum sanguinem

etiam altius virtute prouexit.

Illum

virtuti par eloquentia & doctrina

parem viris maximis,

maiores reliquis,

suspiciendum omnibus dedit.

Quantas ille spes,

etiam cum nullas aleret,

à suâ illâ tam præclarâ indole & virtute  
concepit!

Ab illo ortu tam sereno vitæ primæ,

ab aurorâ tam in ruborem pronâ,

quam non illi

mox obuenturam à cælo purpuram

aliorum hominum ambitiosa mortalitas

promittebat!

Sed Mors

immatura annis,

inexpectata bonis,

inuisa malis, inopina pluribus,

omnibus luctuosa,

vni tantum illi, quia & Deo, placita,

omnium interceptit spes,

expectationes abstulit, vota consumpsit:

illius tantum vnus

spes & expectationes & vota omnia consecrauit.

*Pyra-*

*Pyramis tertia.*

Paucorum dierum violentâ febrî  
pænè simul correptus & raptus est.

Nec potuit nisi vi  
tam incitatus ad virtutem & gloriam cursus sisti.

Quæ tardè mouentur, & quasi serpunt,  
obiectu facili sistuntur & languent:

quia illis  
moueri & iacere  
pænè perinde est.

Virtuti magnus imperus,  
atque ab illo incitatus est cursus;

cui  
quàm agi pronum, tam quiescere violentum,  
nec tamen probrosum est:

quia illi pars viæ & vitæ,  
in quacumque quieuerit, est meta:  
& momentum temporis vltimum,  
beatæ principium est æternitatis.

Benè ergò NATALI,  
euge, feliciter RONDININO,  
cui cursus vitæ fuit  
breuis annis, immaturus ætati;

sed  
virtuti longus, & gloriæ consummatus.  
Ad se deductam natalium serie nobilitatem omnem  
vno in se NATALI complexus,  
quia viuendo vltra promouere non poterat,  
moriendo fortiter consecrauit.

Nihil vt sui fortunæ relinqueret,  
aliquid auferri naturæ  
libenter passus est.

Extra cuius ictum se posuit & sua,  
quando viuendi finem fecit:  
quia quàm illi obnoxia infelix est vita mortalium,  
tam ab illo liber est beatus exitus mortuorum.

Virtutem, quam viuus semper coluit,  
semel moriendo non perdidit, sed inuenit.

Sola enim virtus, quam obsignauit vna mors,  
in adeptione secunda est, in possessione confirmata.

*Pyra-*

*Pyra-*

*Pyramis quarta.*

Cùm os morte clausit, eloquentiam quâ valuit non amisit;  
 quia ex quo loqui immortalis mente cœpit,  
 mortalis linguæ impedimenta non sensit, & officia non quæsiuit.  
 Mortuorum hominum,  
 quorum omnium doctrinam legendo & intelligendo  
 consecutus est,

immortales animas  
 iam vel ex alto despicit infelices, vel ex æquo respicit fortunatas;  
 gaudens hausisse se

ex illis scientiam sine vitio, ex his doctrinam cum virtute.

Nec iam quidquam est

quod illum vel alliciat vel delectet in terris;

nisi quia adhuc in viuis sunt

ALEXANDER quem coluit, FVRSSTENBERGIVS quem amavit;  
 non tamen

aut se illis, aut illos sibi velit esse præsentem:

quia

absentiam illorum à se, felicitate publicâ;

sua ab illis, immortalitate consolatur.

Voti potens, & vitæ sator,

iacturâ non sentit amicorû, quos secû omnes habet in vno Deo;  
 nec vsuram quærit temporis, quod totum æternitate complectitur;  
 nec de mortis iniuriâ queritur, quando illi debet immortalitatem;  
 nec honorum temporalium ambitione tangitur,  
 iam dominus æternorum;

nec laborat de intercepto mortalis vitæ cursu breui,

quia in immortalis possessione conquietur;

nec denique plus vltra aut optat aut quærit aliquid,

postquam in VNO VERO BONO est omnia consecutus.

Horum ille fidem scientiamque certam si nos docuit,

sibi ac nobis & vixit & dixit satis.

Scire tantum velis & discere, tu quisquis

à NATALI MORTALIS,

Quid VNVM inter omnia sit quod quæras;

Quid VERVM inter falsa sit quod teneas;


Quid BONVM inter mala sit quod ames;

vt possis cum VNO VERO BONO etiam ipse te  
 quærere in vitâ, tenere in morte, amare in æternitate.

Hoc tuum vt sit, tui NATALIS est votum.

NA-

NATALI RONDININO  
 A D  
 ALEXANDRI VII.  
 OBSEQVIA TRADVCTO.



Huc cursus fuit.

**E**rrantes dubio mari carinas  
 In portum vocat ignis, è supremis  
 Ignis montibus eminens refulgens.  
 Incertas Cynosura per procellas  
 Rectum monstrat iter, viamq; pandit,  
 Per quem denique fessa, fracta fluctibus  
 Securum ratis in sinum recurrat.

Magos

NA-

*Magos ex Oriente stella duxit*

*Ad cunas Domini Deiq̄, nostri.*

*Incertum quoque stella RONDINIVM*

*Quò se flecteret, una stella, senos*

*Quæ montes super eminere visa est,*

*Iter carpere iussit expeditum*

*In portum placida sinumq̄, vitæ.*

*Huc cursus fuit. Illa stella fluctus*

*Non tantùm super, & super procellas,*

*Sed montes super, arduasq̄, rupes,*

*Et nubes super, & super planetas,*

*Longè celsiùs Arca quàm Noëmi,*

*Aut Argos fuit eleuata, cursu*

*Errantem dubio ratem leuabit.*

*Hæc te stella, tuamq̄, RONDININE,*

*Sciuiſſes modò prorogare, vitam*

*In summâ potuit locare ROMA;*

*Sed cursu in medio repentè lapsum*

*Ipsò maluit eleuare cælo.*

*O factum benè, RONDININE! Non est*

*Quod demtos tibi conqueraris annos:*

*Prouidit tibi stella longiorem,*

*Quàm possent homines vouere, vitam.*

ROND.  
 NATALI RONDININO

A B

ALEXANDRO VII.

ad secreta cum Principibus  
 negotia admissio.



Sub his pretium non vile laborum est.

**A**N quisquam neget esse te beatum  
 RONDININE? cui datum sub istis  
 Clausum Montibus inuenire vitæ  
 Munus, & pretium beatioris?  
 Telluris penetralibus profundis  
 Perscrutamur opes; mari sub alto  
 Gemmas querimus; abditumq; verum  
 In ipsis studium inuenire fibris  
 Nature; omnia, quæ vel in recessu

Ee

Ma-

NA-



*Magni Numinis occuluntur imo,  
 Vestigare labor. Laboris huius  
 Par numquid pretium fuit? Fuisset,  
 Si secreta oculo magis sereno,  
 Si secreta manu magis capaci,  
 Si secreta animo magis fideli,  
 Quæ sub Collibus inuenire senis  
 RONDINIVS amavit, inuenire  
 Et nobis studio magis beato,  
 Et voto meliore mens fuisset.*

*His sub Collibus ille RONDINIVS  
 Quæ non vidit, amavit, æstimavit,  
 Secreti memor, & capax bonorum!  
 Vidit cor Superis Deoꝝ dignum;  
 Amavit Dominum Patremꝝ mundi;  
 Dotes ingenij æstimavit amplas,  
 Et vim pectoris; omnis officinam  
 Virtutis coluit, suamꝝ fecit.*

*Quis non hanc tibi RONDININE sortem,  
 Nî te plus oculis suis amarit,  
 Sit totus bonus, & vel ipse quamuis  
 Furstenbergius, invidere possit.*

NATALI RONDININO  
ALEXANDRI VII.

familiari vfu ad virtutem & sapien-  
tiam informato.



Hinc certa oracula sumsi.

**D**odona strepere tacete quercus,  
Nec mendacia futilesq; nugas  
Stulto vendite cariùs popello,  
Quàm suas queat aestimare merces  
Aut Phæbi chorus, aut specus Sibylla.  
Sunt hæc somnia vana, sunt furores.  
Quercus quæ Domini mei sacratas  
Cingit bina fores, tenenda celo


Ee 2

Dans

## 436 HONOR SUPREM. NAT. ROND.

*Dans oracula, dans tremenda mundo,*  
*Non umquam Superos fefellit ullos,*  
*Non ullos hominum fefellit umquam.*  
*Hec me, quando fuit rogata cumq̄s,*  
*Numquam fallere docta, RONDINIVM*  
*Leges edocuit, modumq̄e, vitæ*  
*Qui cursum faceret scientioris,*  
*Qui finem faceret beatoris.*  
*Vnum non docuit, suprema nobis*  
*Lustris bis tribus imminere fata.*  
*Dixisset: Moriere; RONDININI*  
*Notum in cortice nomen exarassem,*  
*Optassemq̄r, meâ carere vitâ,*  
*Victurus meliusq̄, longiusq̄,*  
*Quàm promittere posset ullus umquam*  
*In Quercu Domini mei Gemellâ.*

NATALI RONDININO  
 ætatis anno X X X. vitâ functo.



Numeris est omen in illis.

**Q**uod vitæ tibi cursus absolute  
 Romanis crucibus tribus notatur,  
 Non casus fuit. Omen, omen ingens  
 Illis in numeris Deus sacrauit.  
 Sceptrum SEPTIMVS, ille ter-potentis  
 Loco Numinis, utriusque sanctus  
 Et ter maximus Imperator orbis,  
 Quod dextrâ gerit, in crucis figuram  
 Formatur triplicis. Ter ô beatus  
 Vixisti bone RONDININE! Quando  
 Pastorale suum, tuumq; sceptrum

Ee 3

Ad

NA-

*Ad altaria Pontifex videbit,  
Tunc tuos quoque computabit annos,  
Et dicet: Meus ecce RONDININVS illud  
Iam sceptrum gerit, exhibetq; calo  
Annorum numerum Deo dicatum.*

NATALI RONDININO  
post sex lustra ad meliorem  
vitam euocato.



Post sex.

**W**olfangi ad tumulum, futurus olim  
Romane bonus Imperator Urbis  
Henricus, precibus pijs vacabat.  
Cum vox ex adytis Deo sacratis,  
Post sex, visa referre, supplicantis

Aures

*Aures perculit, abstulitq̄, mentem*  
*Inter spemq̄, metumq̄, fluctuantis.*  
*Post senas prius ille forsān horas,*  
*Senos inde dies, & inde menses,*  
*Senos denique cogitabat annos*  
*Imminere diem sibi supremum.*  
*Horas ergò sibi velut supremas,*  
*Dies ergò sibi velut supremos,*  
*Menses ergò sibi velut supremos,*  
*Annos ergò sibi velut supremos,*  
*Viuendo benè transigebat omnes.*  
*Post sex denique, quod timere numquam,*  
*Quod numquam potuisset ominari,*  
*Aut sperare, creatus Imperator*  
*Annos, prodigij fidem probauit.*  
*Post sex & tibi, RONDININE, summo*  
*Vox celo sonuit, diemq̄ dixit;*  
*Non audita, sed in profundiore*  
*Fati murmura continens recessu.*  
*Non minùs tamen & dies, & annos,*  
*Et horas tibi, singulosq̄ menses,*  
*Ceu forent tibi singuli supremi,*  
*Vel momenta notando supputasti.*  
*Sex suprema tibi fuere lustra,*

Ee 4


Post

Aures

Post sex hora suprema te vocavit  
 E vitæ stadio parùm beatæ,  
 Non ad funera mæsta, sed coronam.  
 Nam celi, puto, factus imperator,  
 Spes nostræ dubias metusq; vitæ  
 Infra te positas videre gaudes.  
 O quem te memorem esse, RONDININE!  
 Mortalem? moriendo victa mors est.  
 Natalem? moritura vita numquam est.  
 Tu NATALIS eris, quod esse gaudes.  
 Nam quæcumque dies tibi per omne  
 Magni temporis emicabit ævum,  
 Natalis tibi, semper ordiendo,  
 Et numquam tua finiendo vitæ  
 Æternæ bona, nascitura semper,  
 Et numquam moritura fata pandet.  
 NATALEMq; fuisse te probabit,  
 NATALEMq; probabit esse. Sic ò  
 NATALIS valeas Deoq; vivas!

## NATALI RONDININO

anno vitæ xxx. beatè mortuo.



Hac iter.

**I**N sanâ ambitione quid vel ipsum  
 In cælum ferimur, supraq; cælum?  
 Nequidquam ferimur. Nimis remotum est  
 Quàm conatibus ut queamus istis  
 Supra sidera promouere gressus.  
 RONDININVS ut alta victor orbis  
 Astra scanderet, hinc in illa scalas  
 Ex tribus crucibus locauit vnas,

Hoc Emblema refert scalas plicatiles, de quibus ex  
 Appiano & Plutarcho Lipsius Poliorceticon. lib. 1.  
 Dial. vi.



*Et gressu triplici viam peregit.*

*I nunc ambitiose, iunge currus,*

*Fortunæq; rotas, rotasq; Martis;*


*Et moles super & super superbas,*

*Et gressus super & super potentes*

*Urge. Sidera non petuntur istis:*

*Cælum iam crucibus tribus petitum est.*

NATALI RONDININO  
anno vitæ XXX. mortalitatis victori.



In hoc vince.

**H**osti bella parabat Imperator  
Constantinus; & ecce Crux serena  
In celo micuit, simulq; celo  
Vox audita fuit, fuitq; visa,

In

In hoc vince, referre. Vicit hostem,  
 Romanasq; Aquilas valere iussit,  
 Et signum Crucis omnibus maniplis  
 Inscribi voluit, suumq; fecit.  
 Instabant tibi RONDININE bella,  
 Mortis bella suprema. Signa calo  
 Tres Cruces: micuere, signa vitæ  
 A te fortiter hætenus peractæ.  
 Concurris: moreris; simulq; mortem  
 Cadendo superas. Beata signa,  
 Quæ vitæ fuerunt prius peractæ,  
 Iam sunt symbola semper inchoandæ.  
 Hæc tu symbola RONDININE sola  
 (Non insignia stemmatis paterni)  
 In tuis cupias habere signis.



NATALI RONDININO  
ALEXANDRI VII.

gratiæ & clientelæ immortuo.



Hac ego fronde tegar.

**Q**uam texam capiti tuo coronam  
RONDININE? Nouem suo Poëta  
E lauro cupiunt parare Musæ;  
E rosis Pudor; alba liliorum  
Optat Integritas videreserta  
Circum tempora casta. RONDININE  
Quod votum tibi? Nolo, nolo lauro,

*Nolo*

Nolo liliolis, rosisque puris  
 Intextas aliquis meo coronas  
 Concinnet tumulo. Gemella Quercus,  
 Quae Montes Domini hinc & inde cingit,  
 Si quidquam mereor, virente fronde  
 Hoc corpus tegat, hoc caput coronet.  
 Hæc insignia Caesarumq; sertum,  
 Non vana ambitione, sed fideli  
 Certans obsequio pijsq; votis,  
 Dum vixi, studui usque promereri;  
 Hæc, post fata etiam, velim mereri.  
 At si non merear, dabit libenter,  
 Et gratis dabit, ultimumq; munus  
 (Nam nota est Domini mei voluntas)  
 Vel post fata suo dabit clienti.

At vos, cura quibus mei sepulcri est,  
 Taxo corpus inane, vel cupresso,  
 An lauri potius tegetis umbrâ?  
 Taxos non ego quero, vel cupressos,  
 Non inter geminas iacere lauros:  
 Sub Quercu geminâ volo recondi,  
 Quercu quæ Domino meo dicata est.  
 Hæc Quercus capiti meo coronam,

Hæc

Nolo

I N O

VII.

uo.

*Hæc umbram faciat iacentis umbra;*  
*Et me splendidius iacere credam,*  
*Quàm si, quidquid habet superba Roma,*  
*Exstructum cumulet super sepulcrum.*  
*Vouisti benè, RONDINE: flores*  
*Et frondes alios sacra coronent;*  
*Phæbeis alij tegantur umbris,*  
*Illos taxus inumbret, hos cupressus;*  
*Quercus, quæ Domino tuo sacrata est,*  
*Subter lene tue iacentis umbra*  
*Umbra sola dabit, dabit coronam.*



NATALIS RONDININI  
FVNVS,

Paterni & Materni sanguinis tesseris  
Gentilitiis emblematicè expositis  
ornatum.

INSIGNE PATERNVN.    INSIGNE MATERNVM.



Epigramma.

**S**temmata stent circum generosum aliena sepul-  
crum;

*Hunc circum tumulum non aliena micant.*

*Nempe suum fecit, quod utroque à sanguine sumsit:*

*Sic RONDINIVS, sic suus ille fuit.*

*Accipe posteritas, & auitæ Insignia famæ*

*Transferre in mores tu quoque disce tuos.*

IN NATALIS RONDININI,  
TRES HIRVNDINES,

à quibus RONDININI nomen,  
in teniâ aureâ per areas virides & rubras  
sursum tendentes.

*Lemma emblematicum.*

Hac iter in cælum.

Epigramma.

**Q**uò vos itis Hirundines beata,  
Lugentes tamen, & velut gementes?  
Quò nos fata vocant trahuntq; fata.  
Nec tristes tamen aut velut gementes:  
Gaudentes simul & simul canentes  
Imus, quò prior ipse RONDINIVS,  
Cui nomen dedimus, præisse gaudet,  
Quà sursum via tota luce fulgens,  
Plus quàm lactea, ducit in supremos  
Per campum viridem rubrumq; calos.  
Non illum decor aut vigor iuuenta,  
Non & purpura, quæ moratur ipsos  
E diuis genitos, soloq; figit,  
In nostris potuit tenere terris.

*Illuma*

*Illum purpura traxit vna cæli,  
Et veris decor vnus auit erui.  
Illis qui capitur, rubente pallâ  
Et decore potest carere verno.  
Numquam purpura solis erubescit,  
Nec cæli decor exuit colorem;  
Cælo scilicet hic & ille constant.  
Sat dixistis Hirundines beata.  
Nam vobis Philomela tale carmen,  
Sit soror licet, inuidere possit.*

IN NATALIS RONDININI

tres hirundines gentilitias.

*Lemma Emblematicum.*

Non fatis vna.

Epigramma.

**P**onè secuturi prænuntia veris hirundo est;  
Ver sed adesse tamen non satis vna docet.  
Nascenti tibi terna tuo cum nomine venit,  
Nescio quid tenui murmure visa queri.  
Ver erat hoc vitæ venientis, non erat anni;  
Pronus in autumnum scilicet annus erat.

*Illum*

Ff

*Ver*



*Ver erat atatis ; sed enim quoque pronior illa  
In finem vitæ prætereuntis erat.*

*Hoc fuit incerto quod murmure tristis hirundo*

*Visa queri est, fati nuntia prima tui.*

*Itæ pia volucres, fatales linquite terras,*

*Quæ domino vitam præripuere breuem.*

*Ortus in occasum est. Nemoris iam rura beati*

*Hic tenet ; huc etiam vos iubet ille sequi.*

*Ver ubi perpetuum est, ubi nulla iniuria lapsi*

*Temporis, aut hiemis bruma timenda venit.*

*Hic dabitur, non iam Philomelæ fata sororis,*

*Fata sed extincti fratris acerba queri.*

*Et fuit ille velut Philomelæ frater, amæno*

*Cùm placidum blandè funderet ore melos.*

*Nempe sed inuidit casto grauis æstus amori:*

*Æstus ab indornitis febribus ille fuit.*

*Ille sonum abruptit linguæ vocalis ; & ori,*

*Quod solitum celo digna Deoq; loqui,*

*Imposuit mæsto lugenda silentia mundo,*

*Attonuitq; homines, attonuitq; feras.*

*Ecce silet, tantumq; suæ præconia famæ,*

*Ipse verecundâ quæ bibit aure capit.*

*Nempè satis dixit, pro quo fama ipsa loquetur*

*Semper, & æterni testis honoris erit.*

IN NATALIS RONDININI  
areas gentilitias, ex viridi & rubro  
decussatas.

*Lemma Emblematicum.*

Benè conueniunt.

Epigramma.

**Q**uam sibi descripsit gens Rondinia parmam,  
Parte viret, Tyrio parte colore rubet.  
Gratus vterque color: scuti benè pingitur illo  
Area: virtutum prodit utroque notas.  
Quà viret, integritas non umquam lesa notatur;  
Quà rubet, ingenui signa pudoris habet.  
Sic tua, Natalis, te propter picta videri  
Parma queat, prisca sit licet illa domus.  
Quisquis in hac color est; color est virtutis, & inde  
Indicium vere nobilitatis habes.  
Scuta humeris alij tollant sua: te tua tollunt,  
Nec venit à proavis laus tibi sola tuis.

illa  
undo  
n.  
beati  
qui.  
lapsi  
venit.  
oris,  
no  
elos.  
ori:  
t.  
ri,  
i,  
quetur



## IN NATALIS RONDININI

ouem cum leonibus coniunctam  
in scuto gentilitio.

*Lemma Emblematicum.*

## Diuinæ insignia pacis.

## Epigramma.

**Q**uem te, Rondinine, tui genuere parentes?  
Sacula quæ talem te genuere tuis?

*Hinc ouis, inde feri posito terrore leones*

*Dicuntur cunis accubuisse tuis.*

*Nempe erat hoc insigne tuæ prænobile Matris;*

*Tessera erat vitæ plus tamen illa tuæ.*

*Illæ eadem, quæ venturi prænuntia Christi*

*Fatidico quondam carmine dicta fuit.*

*Isaiæ c. 11.*

*Euenit. Fuit afflicto pax reddita mundo,*

*Et rabidi inter oues accubere greges.*

*Accubere etiam tibi, Rondinine; fuitque*

*Simplicitas animo & vis generosa tuo.*

*Quis furor has inter comites diuortia fecit?*

*Tam sanctæ paci mors inimica fuit.*

*Fallor, amica fuit: pacem mors sancijt istam.*

*Nulla timenda tibi Iudicis ira fuit.*

IN

## IN NATALIS RONDININI

gentilitios leones duos, palmam  
vnam capientes.

*Lemma Emblematicum.*

Palmam vis animosa capit.

Epigramma.

**R**ondinine, tui palmam rapuere leones:  
Illa animi, & virtus corporis illa tui.  
Mors palmam eripuit sed utrisque potentior vna.  
O fera mors, quàm tu non patienter agis!  
Fallor, habes palmam: nam cum te funere sancto  
Mors rapuit, palmam non tulit illa tuam.  
Illa manet caelo felicibus insita ramis,  
Et viret, & nullo pondere pressa cadit.  
Ostentatq; tuum generoso in cortice nomen.  
Tanti est posse Deo viuere, posse mori.

IN NATALIS RONDINI  
gentilitias rosas rubras sex.

*Lemma Emblematicum.*

Casti hoc insigne pudoris.

**A**lba diu fuerat ; sed amico sanguine tin̄ta  
Dicitur in campis erubuisse rosa.

*Alba fuit rosa materno tibi sanguine surgens ;  
Sed modo purpureo tin̄ta colore rubet.*

*Alba decent castos : rubor est insigne pudoris ,  
Et rubor immeriti signa doloris habet.*

*Te nascente fuit rosa candida ; sed citò facta est  
Purpurea, ante diem te moriente, rosa.*

*Vtraque nempe tua est ; color hic virtutis uterque est.  
NATALI candor conuenit atque rubor.*

*Conuenietq̄, etiam celo confusus & astris,  
Simplicis auroræ qui color esse solet.*

*Sic florete rosæ misto candore cruenta:*

*Sic niueâ semper fronde rubete rosæ,  
Ille color nascentis erit Natalis ; at esse*

*Ante diem eiusdem demorientis erit.*

*Sic senas quicumque rosas, numerabit & annos ;  
Et dicet: Lustris sex fuit, & moritur.*

*Sed benè quod rosa sena etiam post funera viuit :  
Omen habet vitæ scilicet illa tuæ.*

IN

## IN NATALIS RONDININI

gentilitias pilas cæruleas tres in  
campo candido.

*Lemma Emblematicum.*

Hic lusus fuit.

## Epigramma.

**C**æruleæ tres in niueo stant ordine campo,  
Et numero meritis conueniente pile.

Lusus hic est vitæ quem Rondininus amauit,  
Et victor fati quo fuit ille sui.

Nulla solo serpsit, celo pila missa sereno est;  
Inde tribus venit cæruleus ille color.

Si qua solum tetigit, pila pulcrior inde remissa est:  
Nam macula in niueo non erat vlla solo.

Candida vita fuit, castoq; instrata nitore;  
Æmula sed cali mens fuit vsque sui.

Ter geminâ mens vna Deum virtute secuta est,  
Atque ipsum tetigit qualibet vna Deum.

Mota prius fuerat, sed iam pila terna quiescit:  
Nempe quieta, Deum quæ tenet, esse potest.

NATALI RONDININO  
bonorum à malis benignissimo vindici.

*Emblema.*

Cribrum cribrans farinam.

*Lemma.*

Iustum secernit iniquo.

**Q**uisquis erit qui sincerum secernet iniquo,  
\* Ille mihi magni Numinis instar erit.

Exulis hæc mæstas domine Babylonis ad undas  
Vox fuit : ipsius vox fuit illa Dei.

RONDININVS erat: sed quem Parca inuida nostris  
Eripuit terris, cælitibusq; dedit.

Iniustum quid enim est illic, secernere iusto  
Quod cupias? horum plurima hic orbis habet.

Reddite depositum cæli, quod inutile vobis;  
Vtile sed terris omnibus esse potest.

Illius ipsa volet censuram Roma subire;  
Quin etiam, quamquam sancta sit, aula volet.

Et mores si fors corruperit error honestos,  
In mores cupiet quisque redire bonos.

\* Si separaueris pretiosum à vili, quasi os meum eris.  
Jerem. 15.

*Hæc*

HONOR SUPREM. NAT. ROND. 457

*Hæc RONDININI virtus agitata valebat*

*Efficere. Heu! terris rapta sed illa fuit.*

*Conspiciam hanc saltem Superi transcribite celo,*

*Et stellas inter CRIBRA serena micent.*

*Illa vel è terris obtutibus hausta secundis*

*Iustitiam poterunt quemque docere suam.*

NATALI RONDININO

non sua, sed suorum commoda spectanti.

*Emblema.*

Cribrum quod dat florem aliis,  
furfures sibi seruat.

*Lemma.*

Non sibi, at suis.

**N**on sibi, sed curare alijs sua cōmoda quantū est!  
*Diuinæ reor hoc mentis & artis opus.*

*Sol oculus mundi, qui cælum & quidquid in illo est*

*Ambit, & æthereo lumine cuncta fouet,*

*Prospicit ille sibi? nihil est virtutis in illo,*

*Iucundum quod non omnibus esse velit.*

*Si qua coruscanti fuligo absistit ab igni,*

*Non alijs illam adspargere rebus amat;*

*Hanc sibi seruat. Et hinc maculis sordescere solem*

*Cernimus. Hoc casti pignus amoris habet.*

*An sibi prospiciunt fontes? Quis fontibus ipsum*

*(Vera canant vates) numen inesse neget?*

*Hæc*

Ff 5

*Non*



*Non Deus, at magnum natura est numen in illis.*

*Quidquid habent puri, quidquid honoris habent,  
Dant alijs; sibi quod pingue est crassumq<sub>2</sub>, reseruant:*

*Quàm sibi, plus cupiunt omnibus esse bene.  
Optima quæq<sub>3</sub>, sinu tellus producit aperto;*

*Illius in gremio deteriora latent.*

*Scilicet & tellus (mater fuit illa Deorum  
Vatibus) hoc etiam numinis instar habet.*

*Quid Deus ipse? unum, verumq<sub>2</sub>, bonumq<sub>3</sub> per omnes  
Diuidit, & plenos numinis esse cupit.*

*Si quid iners herere Deo prauumq<sub>2</sub> valeret,  
Non hoc alterius vellet, at esse suum.*

*Et voluit: sibi culpam hominum; sibi, debita sumsit  
Supplicia: hac illos reddidit arte Deos.*

*Numen inesse negem tibi, RONDININE? fuisti  
Quod te nota tibi CRIBRA fuisse docent.*

*Non sibi, sed prodesse suis tua viuida virtus  
Non quantum voluit se potuisse dolet.*

*Mors tua virtuti fuit inuida. Vita fuisset  
Longior, in seros edita vita dies,*

*Illius ô! quàm magna forent exempla parata  
Omnibus, & genij quot monumenta tui!*

*Fecisti benè, dum licuit mortalibus ægris;  
Hi benè defuncto, quod licet, esse volunt.*

NATALI RONDININO  
beneficiis numquam victo.

*Emblema.*

Cribrum accipiens in se farinam,  
& reddens florem.

*Lemma.*

Accipit ut meliora reddat.

**Q**uid magè diuinum, largà dare munera dextrâ,  
An meliora datis reddere muneribus?

Hoc reor esse Deo propius. Non vincitur ille

Muneribus; melius reddere semper amat.

Hoc erat, ille meus quod RONDININVS amauit

Semper, amicitiae cultor amorq; sacrae.

Accipit; sed ut his meliora reponere posset:

Vnicus hic animi lusus amantis erat.

Et certamen erat generose mentis honestum,

Quo vinci, atque iterùm vincere magnificum est.

CRIBRA (Cribellorum sunt hæc insignia) testor,

Quæ gerit in titulis hic quoque prima suis.

CRIBRA quidem accipiunt, sed ut his meliora reponant.

O! gerat in titulis quilibet illa suis,

IN OBITVM  
 NATALIS RONDININI  
 IACOBVS LIBENVS  
 E SOCIETATE IESV.

AD FERDINANDVM

LIB. BARONEM DE FVRSTENBERG,  
 S. D. N.

ALEXANDRI VII.  
 PONT. OPT. MAX.  
 CVBICVLARIVM INTIMVM, &c.

**L** Vgete vates, tuq; magnorum arbiter  
 Facunde vatum, funebrem lessum præi,  
 Positaq; lauro, fronde ferali caput,  
 Fernande, cinge: causa lugendi grauis.  
 Heu! Rondininus, ille Musarum sinu  
 Exceptus olim, quando materno puer  
 Gremio cadebat; mox secuturis chelyæ  
 Taçturus annis; inde cùm maior virum  
 Formarit ætas, ore prompturus sacro  
 Sublime carmen, quod poëtarum chorus  
 Miretur omnis, quodq; Parnassi iugo  
 Resonante feriat astra, Diuosq; exciat:

Heu!

*Heu! Rondininus, ille grandævæ labor*  
*Et summa matri cura, 1 nec minor tamen*  
*Matri voluptas: ille tot fratrum decus,*  
*Amor sororum, gaudium tantæ domus,*  
*Æquare 2 Paulum purpurâ, atque annis 3 avum*  
*Superare dignus: ille tantarum capax*  
*Gnarusq; rerum, Iuris, & Consi, 4 & sacræ*  
*Plenum Sophiae pectus, & Suadæ nitor,*  
*Medulla Charitum: quodq; plus cunctis reor,*  
*Magno ille 5 Fabio, magno Alexandro ( aureis*  
*O nata seclis nomina, & fausti ominis! )*  
*Cliens patrono traditus; fors hac manu*  
*Gradus per omnes, vita si staret super,*  
*Ducendus ipsum ad culmen Imperij sacrum:*  
*Heu! Rondininus ille nunc funus iacet,*  
*Ætatis ipso flore succisus, rosæ*  
*Vernantis instar, subita quam durâ necat*

1. Felix Zachia Rondinini nostri mater, cui maritus Alexander moriens novem liberos reliquit.

2. Paulus Æmilius Rondininus, S. R. E. Cardinalis, frater nostri, pius admodum & doctus.

3. Natalis Rondininus, nostri avus, centenarius fuit.

4. Noster Græcè & Latinè doctus, Jurisprudentiæ & Theologiæ peritus.

5. Fabius Chisius, antea S. R. E. Cardinalis, nunc Alexander Papa VII. Rondininum nostrum in familiâ suâ habuit, & scribendis ad Principes epistolis adhibuit.

Heu!

*Pruina*

*Pruina morsu. Fata prò nimium inuida!*  
*Spes ille quantas occidens secum trahit,*  
*Infertq; tumulo! rapuit immitis virum*  
*Libitina, nil miserata, non celsam indolem*  
*Moresq; castos; non & antiquum genus,*  
*Non & iuventam; non Apollineam quoque*  
*Reuerita laurum, 6 Laura quam caro excipe*  
*Fratris cadentem vertice, in castum tui*  
*Sertum pudoris, inq; doctrinae decus.*  
*Nam & ipsa vates, scita Donatum loqui*  
*Gallutiumq; Virgo; solers & tuos,*  
*Bentiuole, Belgas voluere, atque ipsos potens*  
*Donare Latio, cura n̄ sacratio*  
*Teresianis rapiat in celum ignibus*  
*Humana solido cuncta calcantem pede.*  
*Quid fata culpo? caeca gens mortalium*  
*Nescimus in quid rapiat, aut seruet Deus:*  
*Et saepe seruat, cum rapit. 7 Non est Deo*

6. Laura Rondinina, nostri soror, doctrinâ & literis à Tarquinio Gallutio, & Alexandro Donato Societatis IESV Patribus egregiè imbuta, cui Cardinalis Bentiuolus suam de Bello Belgico historiam Latinè vertendam tradidit, quod tamen ipsa modestè recusauit, abdicatis sæculi curis nunc in Cœnobio Virginum sanctæ Teresiæ sanctissimè viuens.

7 Sap. 4. Raptus est, &c.

*Testante,*

NATALIS RONDININI. 463

*Testante, non est semper in canis salus,  
 Nec vera in annis vita. Vixit is diu,  
 Qui validus ævi, qui puer diem benè  
 Clausit supremum. Non tuos hinc iam sequor  
 Manes querelis, sorte nec mæstus tuâ  
 Te plango, Rondinine; sed luctum ardeo  
 Mutare plausu, quando pars melior tui  
 Se iam beatis calitum admiscet choris  
 Letum canens pæana. Non omnis iaces;  
 Et urna cineres quæ brevis claudit tuos,  
 Non claudit animam, sidera & cæli super  
 Globos euntem, & spatia mirantem poli  
 Immensa, quæ non 8 Archimedeo datur  
 Obire radio. Nec tamen nostris procûl  
 Terris abiisti: vivis & spiras adhuc  
 Te maior ipso, & carior iam nunc tuis.  
 Suprema te non abstulit mundo dies,  
 Sed genuit: oris namque terrarum ultimis,  
 Per utramque solis cuncta lustrantis domum  
 Te, Rondinine, (non sat auditum exteris  
 Huc usque populis nomen) ex hoc iam die  
 Perennibus te fama cantabit tubis.*

8. Matheseos in primis peritus fuit.

Non,

Testante,

*Non ergò, non hunc esse funestum tibi,  
 Sed esse vitæ crede natalem nouæ.  
 Et tu querelis parce iam tandem, tuis  
 Iam parce lacrymis Zachia, quæ nullâ magis  
 Felix 9 virorum prole. Natalem iuuet  
 Genuisse vel sic. Ille germanos supra,  
 Ipsumq; Ioseph (dulce 10 mihi nomen) cruor  
 Quem 11 iure decorat Ottomanorum, & suus,  
 Lauro decorus ibit; ut laurum super  
 It lingua, doctæ ut arma concedunt togæ.  
 Nec inuidebis postumum hoc fratri decus,  
 Caroq; cineri facilis hanc palmam annues,  
 Pietate prestans Paule, quem Patrum eminens  
 Effert Senatus, quemq; gestantem infulas  
 Sibi gratulantur 12 Assisinate patrem.  
 Tuq; illa rerum domina, terrarum dea,  
 Quæ septicolli vertice attingis polum,  
 Fecunda vatum Roma, Natalem 13 tuum  
 Plorare cessa. Viuit, in suo integer*

9. Felix Zachia multorum filiorum mater.  
 10. Alludit poëta ad suas de Iosepho tragædias.  
 11. Iosephus Rondininus, nostri frater, profligatis ad  
 Candiam Turcis, maiori tubo ictus occubuit.  
 12. Rondininus Cardinalis Assisiorum Episcopus.  
 13. Rondininus noster Romæ natus.

*Achate*

*Achate viuit, Musa quem functo parem  
 Et Rondininum est visa fecisse alterum.  
 Habes in vno, Roma, 14 Furstenbergio,  
 In Rondinino quidquid amissum gemis.  
 Habes in vno, Roma, Furstenbergio,  
 Bellona quamuis ferrea hoc saeculum terat,  
 Saeculi Poetas aurei, quos & colat  
 Augustus ingens, Valliumq; & Hesium,  
 Et qui sequuntur. Ire iam nobis quoque  
 Post Rondininum vatibus ad umbras licet,  
 Tu dum super sis grande Parnassi decus,  
 Sacriq; Ferdinande, moderator chori,  
 Dignum cothurno nomen, & plus quam meo.  
 Tuq; o sacrorum maxime Antistes, vicem  
 Gerens Tonantis, proximum Christo caput,  
 Cui fas olympum clauibus caelo datis  
 Reserare, fas & claudere, extinctum haud puta  
 Quem lux auorum, 15 illustre Boldrini genus,*

14. Ferdinandus Furstenbergius Rondinino nostro amicissimus fuit; Poeta & ipse maximus.

15. Rondininus noster suos inter Maiores numerabat Boldrinum, de quo Sfortiades; Nicolaum, de quo Marcus Guascus; Bartholomaeum, de quo in Chronicis Praedicatorum, cuius ope & consilio Pisanum Concilium est dissolutum.



*Et orbis Atlas ille, Romanam fidem  
 Pisis labantem pace qui fulsit suâ,  
 Tam clara proauum nomina exstingui vetant:  
 Quem pura sceleris vita, candorq; ingeni,  
 Linguae venustas, certa virtutis comes  
 Scientiaq; fama; quem vates 16 tui  
 Post fata canimus. sic mori votum est mihi.*

16. Alexander Papa VII. Mæcenas Poëtarum  
 Optimus Maximus.



.ROND.

FERDINANDO  
LIB. BARONI DE FURSTENBERG,  
S. D. N.

ALEXANDRI VII.  
PONTIFICIS OPT. MAX.  
CVBICVLARIO INTIMO,  
Canonico Paderbornensi, Hildesien-  
si, Monasteriensi, Hildesij Ecclesie  
S. Crucis Præposito

*Jacobus Vallius è Societate I E S V.*



FFECISTI, Illustrissime Fursten-  
bergi, cum Elegiam in Natalis Ron-  
dinini funere à te scriptam legi, vt  
aliquid eodem argumento scriptu-  
rus, necesse duxerim mentem aliò conuertere.  
Cum enim amantis dolentisque partes omnes  
à te absolutissime expletas esse animaduerte-  
rem, vix videbam, quid à me prætereà in hac  
causâ apud te proferri posset, qui mihi lacry-  
mas omnes absumsisse videbaris. Si è prisco  
funerum & collacrymationum ritu colligen-  
dæ essent tuæ, crystallo, auro, gemmis excipe-  
re eas oporteret, quibus non antiquariorum  
abaci, sed poëtarum scrinia ornarentur. Ha-

Gg 2 beba

FER-

etant:  
mî,  
mibi.  
as Poëtarum

bebat ille veterum luctus delicias etiam suas, cum lacrymas unà cum succis odoratis & unguentis Assyriis confundebant : at tuo erga Rondinium studio, amore, pietate nihil potest esse suavius. Ut mihi quidem alabaster nullus unguenti plenus cum lacrymis tuis suavissimè redolentibus conferri posse videatur. Γλυκύπικρον illud quod in amore, præsertim cum ab amante diuellitur, inesse solet, luculentius prodi non potuit. Mihi igitur in luctu tecum communi scribere ad te quidpiam cogitanti doloris potiùs aberrationem, quàm eiusdem irritandi causas quærere consilium fuit. Occurrebant Philemonis Græci poëtæ versus, quem etsi Comicum, numeris tamen arctius vinctis Latinè loquentem feci. Non quòd ignorarem, quod ait Cicero, in tragœdiâ comicum vitiosum esse, & in comœdiâ turpe tragicum, sed quòd existimarem eum qui ad progressum in literis refert omnia, posse exercitationis gratiâ optimorum auctorum uti virtutibus atque sententiis; verba efferendi que morem persequi eatenus, quoad res, & locus, & scribentis animus tulerit.

Εἰ τὰ δάκρυ' ἠμῶν τῶν κακῶν ἔσ' φάρμακον,  
 Ἄει θ' ὁ κλαύσας τὲ πονεῖν ἐπαύετο,  
 Ἡλλατόμεθ' ἂν δάκρυα, δόντες χεῦτίον.  
 Νυῶ δ' εἰ πορτέχῃ τὰ ἀεζύματ', εἰδ' ἀποβλέψῃ.  
 Ἐάν τε κλαίης, εἰάν τε μὴ, πορσύεθ'.

Τί δὴ ποιεῖς; πλεον εἰδένῃ ἢ λύπη δ' ἔχει,  
Ὡς περ τὸ δένδρον τὸ καρπὸν, τὸ δ' ἄκρυν.

*Si flere nostris esset auxilium malis,  
Lacrymisq; sese penitus egereret dolor,  
Mercarer auro lacrymas: nunc quid iuuant?  
Fortuna curat scilicet, quo te premat  
Aduersa fato: respicit flentis genas.  
Sint squalida humidaq;, sint terse tibi,  
Nil te morata pergit, & cursum tenet.  
Tuus igitur ille quid dabit luctus? nihil.  
Sed arbor ut fert poma, sic lacrymas dolor.*

Prudentis igitur poetæ vsus consilio, teque à mœrore, quem importuna mors attulit, abstracturus, ad equestrem decursionem prisco ritu in fortium virorum funeribus exhiberi solitam voco. Scis in quæ tempora inciderit Rondinorum virtus: qui pacis & otij turbines ac tempestates Italiam vniuersam conuellerint, cum in Galliam traductâ Pontificum Romanorum sede ciuiles discordiæ miscerent omnia, & ut quisque ad seditionem & vim opibus instructior ac paratior erat, ita liberiùs latiusque dominatum per vrbes occuparet. Fidei animorumque pleni pro Pontificiâ causâ steterunt Rondinini. Quorum militaris indoles ac fortitudo ad posteros deriuata Natali quoque no-

EMVS

etiam suas,  
ratis & vn-  
at tuo erga  
te nihil po-  
m alabaster  
nis tuis sua-  
te videatur.  
esertim cum  
luculentius  
uctu tecum  
m cogitanti  
m eiusdem  
fuit. Oc-

etæ versus,  
men arctius  
Non quod  
agœdiâ co-  
œdiâ turpe  
eum qui ad  
posse exer-  
um uti vir-  
fferendi que  
s, & locus,

έρμακον,

υσίον.

δ' ἀποβλέπει.

τί

stro hos indidit spiritus, vt, quamquam partem ipse nullam bellici muneris attigerit, tamen de rebus quæ belli administrandi sunt propriæ, differere in tempore, & suadere, & manu etiam aliquid designare vtiliter posset. Sit igitur, quando Musis nostris sic incidit molestiam, & acerbitatem ex amici morte à te susceptam mitigare; sit, inquam,

NATALI RONDININO,

S. D. N.

ALEXANDRO VII.  
 AB EPISTOLIS AD PRINCIPES,  
 BELLICAM SVORVM GLORIAM,  
 QVA LICVIT, ÆMVLANTI,  
 EX ANTIQVO FVNERVM MORE  
 TROIANA DECVRGIO.

**Q**uid iuuat exsequias longis miscere querelis,  
 Et tantum lacrymas, munus inane, dare?  
 Non ego Natalem, quamuis mæstissimus, illis  
 Prosequar: ignoscat, non mihi flendus erit.

Cum

NATALIS RONDININI. 471

*Cum subit illius tamquam morientis imago,  
 Qui Pylios annos viuere dignus erat ;  
 Cum repeto primos cui, quos gessit, honores,  
 Et Romæ quot spes abscidit vna dies,  
 Flere quidem natura iubet: sed dicere pace  
 Nature liceat, quod iubet illa, grauat.  
 Non prodest certè: nec si que fleuimus vnumquam  
 Funera, defletis reddita vita fuit.  
 Ergò ades, & mecum potiùs, Fernande, dolorem,  
 Quem penitùs nequeas tollere, felle tuum.  
 Vt se mens fallat, luctuq; exsoluat amaro,  
 Multa mouet: res est ingeniosa dolor.  
 Mitiùs vt Thebe ferret tua fata, Palemon,  
 Addidit exsequijs Isthmia sacra tuis.  
 Archemorum fleuit Nemeæ: sed & illa peracto  
 Funere victores currere vidit equos.  
 Iusta Menætiadæ mæstus soluebat Achilles,  
 Et pariter ludos, altera iusta, dabat.  
 Sic quoque festa fuit, letosq; nouauit honores,  
 Quæ fuit Aneæ semper acerba dies.  
 Affuit, & patris monitu puerilia duxit  
 Agmina Sidonio vectus Iulus equo.  
 Diductis nunc illa choris, nunc currere iunctis:  
 Nunc lituus pugne, nunc dare signa fugæ.*

Ipse puer pueris pietate præibat & armis,  
 Spectari causâ dignus utrâque puer.  
 Forsan & addiderit : Sic Troiam Troia resurgens  
 Instruat, & nostro sæpè parentet auo.  
 Quis non hæc inter vultumq̃, animumq̃ remisit,  
 Et cauea iunxit plausibus ipse suos ?  
 Poscebant lacrymas, poscebant funera questus :  
 Questibus & lacrymis hæc posuere modum.  
 O quæ tot magnos, i gens Rondinia, censēs  
 Bellica quos celo gloria vexit auos,  
 Hunc tibi quis morem referat, carisq̃, tuorum  
 Manibus has pompas inferiasq̃, paret !  
 Quos litui, dum vita fuit, quos arma iuuabant,  
 Credibile est illo mortis honore capi.  
 Hæc quoque Natalem caperent simulamina belli,  
 Cui belli quondam munia ludus erant.  
 Ludus erant pernicious equi nunc ora lupatis  
 Fletere, nunc iusso figere tela loco :

1. Non, vt Ouidius in Tuticani, ita ego in Rondinini  
 nomine hîc ludam, ac delicias faciam. Ab hirundinibus  
 quidem nomen & scuti tesseram sibi sumfit illustrissi-  
 ma gens : verùm si quis de secundæ syllabæ quantitate  
 mecum contendat, pro me stabit Centaurorum vnus,  
 Qui clypeo, gladioq̃, Macedoniâque sarisâ  
 Conspicuus. Ouid. Metamorph. 12.

Nunc

NATALIS RONDININI. 473

Nunc præducendos urbi describere vallos,  
 Nunc formam castris aggeribusq; dare:  
 Interdum virgâ, virgam cum fortè teneret,  
 Ducere in exiguo puluere Martis opus:  
 Interdum, tamquam pugna data signa vocarent,  
 Ad pugnam fortes esse iubere viros.  
 Si non Æacides, si non Telamonius armis,  
 Consilij pleno pectore Nestor erat.  
 Quis nescit? laus cuique sua est: bello alter & alter  
 Vtilis: hic animo rem gerit, ille manu.  
 Fabula nota quidem, sed rebus idonea nostris,  
 E grauido Pallas vertice nata Iouis.  
 Non illi præsens aderat Lucina dolenti,  
 Solueret ut partum molliùs ipse suum.  
 Mulciber impacto iuncturas verticis ictu  
 Diffidit: eiq; illo vulnere nata dea est.  
 Et patrium mox illa genus moresq; probauit  
 Edita: quàm sapiens, tam bona miles erat.  
 Hinc quæ consilij, eadem dea præsidet armis:  
 Nec minùs est laudi, quidquid inermis agit.  
 Palladis armata est acie concurrere, strages  
 Edere, confusâ vertere castra fugâ.  
 Qui inuet ingenio vires, qui temperet aptis  
 Omnia consilij, illud inermis habet.

Nunc

G g 5

Pars



*Pars hæc Natali placuit : sic arma gerebat :*

*Sic erat ipse suæ pars imitanda domus.*

*Fortunata domus, si te modò prisca tulisset*

*Græcia spectatrix roboris ipsa tui!*

*Tota tibi Nemeen complens bimarisq; Corinthi*

*Litora, quadrijugis afforet acta rotis.*

*Nunc tua dum virtus 2 Italis caput extulit oris,*

*Nil agat in laudes Itala terra tuas?*

*Hei mihi, qualis erat, studijs dum scissa suorum*

*Præda foret belli sanguinolenta sui!*

*Qualis erat, dum quot populos numerabat & vrbes,*

*Tot dominos esset pænè coacta pati!*

*Quæ poterat (ius arma dabant) sibi subdere quisque*

*Oppida, victoris præmia Martis erant.*

*Huic 3 Antenoridùm sedes, illi inclyta cecidit*

*Mantua : Veronam diripuere Canes.*

*Sic lacer Actæon iacuit, cùm terga Melampus,*

*Pectora Theridamas scinderet, exsta Lacon.*

2. Floruere Rondinini, cùm Romani Pontifices in Galliâ se haberent. Quam sedis mutationem grauissima hæc præ ceteris exceperunt mala:

3. Arsit intestino bello Italia, & Carrarij Patavium, Mantuam Passerini, Scaligeri Canes Veronam, alij alias vrbes armis sibi asseruerunt :

*Aut,*

*Aut, ubi Thebanae laniant Penthea matres,  
 Hæc caput, hæc humeros abstulit, illa manus.  
 Quid referam, quos, Roma, tibi fecere timores  
 Sæua 4 tribunitius quæ tulit arma furor,  
 Et malè sacrilegâ gestatus fronte 5 tiaras,  
 Et malè Cæsareâ 6 rapta corona manu?  
 Auxerunt portenta metus: mons Cælius arsit,  
 Flaviadæq; labor 7 templa fuere rogas.  
 Non aliàs 8 crinem celo sparsere cometa  
 Tristiùs, & medium condidit umbra diem.  
 Non aliàs grauiore lues incanduit æstu,  
 Et tellus victum parciùs agra dedit.  
 Ah, cur Romanis umquam Pater Urbis abiuit  
 Sedibus? abscessit non comitante Deo.  
 Cur umquam Rhodanum Tusco malè pratulit amni?  
 Illa fuit tanti prima fauilla mali.*

4. Nicolaus Laurentij, scriba populi Romani, multitudine ad spem libertatis erectâ, in tribunitium nomen ac potestatem Imperatoriam inuasit:

5 Nicolaus V. præter legitimum incrementum Pontifex creatus est à Ludouico Bauaro, qui iniussu Romani Pontificis Ioannis X X I I. pro Imperatore se gerebat:

6. Ab eodem Bauarus Romæ Imperij sumfit insignia:

7. Laterana Basilica in monte Cælio deflagrauit:

8. Cometæ, solis defectiones, pestes, annonæ penuria terrori & exitio fuerunt.

*Aut,*

*At*

*At quaecumque fuit, gens Rondinina, causam,  
Vnde tibi nomen cresceret, illa dedit.*

*Cum fasti referent, quos atas illa tyrannos  
Extulit: Hesperij qui status orbis erat:*

*Qui bello exciti populi: quae quisque secutus  
Signa: quis hostiles fregerit ultor opes:*

*Quae sint vindicibus pacatae viribus vrbes:  
Quae sint victrici foedera pacta manu:*

*In tantâ rerum serie tua facta recurrent,  
Nec pars historiae parua futura tua est.*

*Testor, Roma, diem, quo non impunè 9 tyrannus  
Explicuit signis obuia signa tuis.*

*Ibat: eum belli circum foedissima nubes,  
Et furor, & caedes, & ferus horror erant.*

*Iam dederat Tuscis leges: infesta sonabant  
Classica per muros pulsa, Rauenna, tuos.*

*Iamq; Quirinales aditum sperabat ad arces  
Sternere Flaminiâ se sibi posse viâ.*

*Restitit, & causâ fidens Boldrinus & armis  
Agmina fulmineo stantia fregit equo.*

9. Nicolaum Piccininum, qui Bononiam, Rauennam, ceteramque Æmiliam Pontifici ademerat, Boldrinus Rondininus bello cepit.

Vtq; leo, si fortè gregem, quem spectat euntem,

In noua bellator pascua taurus agat,

Ille fremit, quassatq; toros: armenta minora

Præterit: in solum vertitur ira ducem.

Nec mora: pugnatur: cruor aduersusq; suisq;

Mutua dum repetunt vulnera, colla lauat.

Horret ager: mussant pauidæ fugiuntq; iuuenta,

Et quæ sperabat præmia victor habet.

Haud aliter medios ibat Boldrinus in hostes:

Successum virtus ipsaq; Roma dabant.

Ductoremq; procùl tumulto speculatus ab alto:

Huc feror: hæc, inquit, quam peto, præda mea est.

Dixit, & vni odijs turmisq; sequentibus instans

Iniectâ tenuit perfida colla manu.

Di iuuere manum: di monstrum 10 informe Latinis

Auertere focis: di voluere capi.

Vidit, & assertus Anemo pater excitus vndis

Ter plausum ripâ liber utrâque dedit.

Et pariter Sapis, pariter popularia longè

Flumina cæruleis exsiliere vadis.

Velatiq; comas, nixiq; liquentibus vrnis

Carminibus fluctus sustinere suos.

10. Piccininus à corporis breuitate nomen acceperat.

Vtq;

Victor

*Victorio, Boldrine : tuis ego debita rebus*

*Flaminiâ statuat fixa tropæa viâ.*

*Defigam tumulo quercum : tremet illa sub armis*

*Quæ feret, & magni nominis arbor erit.*

*Horrescet vertex galeâ : rutilantia pectus*

*Ara tegent, ensis, parmaq; fulua latus.*

*Adijciam titulum: HÆC CAPTO DETRACTA*

TYRANNO

BOLDRINVS PATRIÆ DEDICAT

ARMA SVÆ.

*Talis erat, cùm pro patriis Thrasybulus Athenis*

*Staret, & Actæâ pelleret arce nefas.*

*Talis erat, cùm post actos in vincla tyrannos*

*Timoleon niueis inueheretur equis.*

*Et cineri nondum quisquam sollempnia mittit ?*

*Flaminiâ nondum feruet arena viâ ?*

*Nec tuba commissos cecinit Mauortia ludos,*

*Victoresq; domum palma reduxit equos ?*

*Fungere Boldrini soboles pia, fungere iusto*

*Munere : sic illum te iuuet esse suam.*

*Viueret ô utinam, cui nuper II Creta sepulcrum,*

*Et titulum virtus partaq; fama dedit !*

II. Iosephus Rondininus, Natalis nostri frater, in  
Cretâ cum Turcis pugrâ congressus, gloriosè occubuit.

*Ille*

NATALIS RONDININI. 479

*Ille animis impleret equos, plausuq; iuaret,  
 Troianumq; suo duceret agmen auo.  
 Duceret & fratri, cui nunc funebria mecum  
 Solueret, hic belli munera, carmen ego.  
 Hei mihi, carmen ego, non hic, Fernande, dolores  
 Solatura tuos soluere iusta potest.  
 Invidit Mars illa tibi: fortissima sternit  
 Prima ferè: segnes eximit ipse timor.  
 Quid queror? ecce tibi, quanta est, Romana iuuentus  
 Ferre laboranti velle videtur opem,  
 Et tibi sollemnes, mortis solatia, pompas,  
 Et tibi Troiano ducere more choros.  
 Et tibi iam sedem ripâ Tiberinus amœnâ  
 Dispicit, accliui quâ viret umbra iugo.  
 Huc venies, Fernande: tuo moderabere nutu  
 Omnia: tu cursus signa secunda dabis.  
 Tu præsens animos & vim certantibus addes:  
 Dum placeant, illis tu satis vnus eris.  
 Munera dein capient à te sua: forsan & illos  
 A Musis cupies altera ferre meis.*

IOAN.

IOANNIS BAPTISTÆ  
 TURRICELLI,  
 PATAVINI,  
 FERRARIENSIS  
 ROTÆ  
 AUDITORIS,  
 IN MORTEM  
 NATALIS RONDININI.

**T**E quoque Natalem rapiunt immitia fata,  
 Et rigidas arcent numina nulla manus.  
 Nec te Calliope, nec sanctè cultus Apollo,  
 Nec pietas, nec te vindicat alma fides.  
 Nec generis splendor, nec prodest prima iuuentus,  
 Nec tibi quas largè Copia fudit opes.  
 Scilicet hæc vrunt Parcas, & seuius vrit  
 Iudicium de te Principis, atque fauor.

FINIS.

F I S T A E

L I,

S I S

S,

N I N I.

*nitia fata,*

*a manus.*

*llo,*

*es.*

*na iuuentus,*

*rit*

*or.*



IOANNIS BAPTISTAE  
TYRRICELLI  
PATAVINI  
FERRARIENSIS  
NOTE  
AUDITORIS  
IN MORTEM

MAIAE ANNO DOMINI MDCCLXXII

**T**u quae non sumus, nec te Calliopo, nec famulae culta  
Nec pietas, nec te vindicat auras  
Tunc generis splendor, nec prodest potentia  
Nec tibi quae largae copia fudit auras  
Sicinet haec vivunt Parcae, & sortita tua  
Iudicium de te Principe, atque foveat

FINIS.